

1 CORINTIOS

Pablo queétdih ã túyat tútat

¹⁻² Weém, Pablo, biíhdih daacát túttnit, yeéb Corinto tútchidih moón Jesúíhwãdih wã wahna caá. Dios weemdíh ñíonit, Jesucristoíh túini doonádih ã naáwát túttni wã jumna caá. Pánihni jumna, yeebdíh búdí wã túyat túttna caá. Wã úud panihni Sóstenesbut yeebdíh jenah joinít, búdí ã túyat túttna caá. Yeéb jwí Maáh Jesucristodih jepahnit, Dioíhwã ñi jumna caá. Nihat baácđih moonbút biíc yoobó jwí maáhdih úubhñit, biícđih jumñit pah Dioíhwã jwí jumna caá. Jwiit nihatđih Jesús jwí Maáh ã jumna caá.*

³ Dios jwí íp, jwí Maáh Jesucristobut yeebdíh búdí oinit, í teo wáaca naáh, biícđih ñi túi jumát pínah niijná.

Dios ded pah queétdih ã túi teo wáacat

⁴ Diosđih úubhna, “Paá, queét Jesúíhwãdih búdí oinit, ma túi teo wáacatđih túina caá”, wãpí niijná caá. ⁵ Pánih teo wáacna, ã jéihyanachah, ñi túi jéih naóh yapana caá. ⁶ Páant ã túi teo wáacachah, wã naóhñiji Jesúíh doonádih ñi túi joyóp jĩ. ⁷ Búdí ã teo wáacachah, yeebdíh dedé jéihcat pínah ã wihcan caá. Pánihna, Jesús ã jwúub dei júúwát pínahđih wēi pãinit, ã wēpatjĩh ñi míic túi teo wáacna caá. ⁸ Yeebdíh páantjeh ã túi teo wáacpina caá, caandíh ñi cádahcat pínah niijná. Páant ñi cádahcah, Jesucristo ã jwúub dei júúwáchah, yeebdíh yéejat peéh

* 1:1-2 Hch 18.1

chãjat ã wiŋcan niít. ⁹ Dios jwiít dih ã ñíwip jĩ, jwĩ Maáh Jesucristodih jwĩ túi pej jummat pínah niijná. Páant ã niijátji biíc yoobó ã chãjbiŋna caá.

Í míc jũihñatdih ã cádahat tútat

¹⁰⁻¹¹ Dios páant yeebdíh ã teo wáacachah yuhna, Cloéwã wã pebhna junít, ñi míc jũihñat doonádih weemdíh ã naáwáp jĩ. Páant ñi chãjachah, wã úudwã panihnitá, jwĩ Maáh Jesucristo ã wẽpatjĩh nin pah yeebdíh wã wutna caá: ¡Ñi míc jũihñatdih caanjĩhjuh ñi cádahaá! ¡Páant bóojeh! Yeebdíh túi biíc dih jummat caá náahap. Jesús ded pah ã jummatdih, ded pah ã bohéatdihbut biíc dih ñi túi jenah joyoó. ¹² Páant niijnít, nin pah wã naóhna caá. Yeeb biíc dih ñi túi jumcan caá. Biquína, “Jwiít Pabloíhwã caá. Caán chah túi bohéni caá”, ñi niijná caá. Bitá, “Jwiít Apoloíhwã jwĩ jumna caá. Caánboó chah túi naóhni caá”, ñi niijná caá. Bitá, “Jwiít Pedroíhwã caá. Caánboó chah túi jéihni caá”, ñi niijná caá. Bitá “Jwiítjuh Cristo ã bohéatdih yoobóp dih jéihnit caá. Pánih jumna, jwiítjuh áihwã caá”, ñi niijná yuh caá.* ¹³ Obohjeéhtih, Jesucristo páant ñi jummat pínahdih át bohécap jĩ. Weém, Pablo, yeebdíh wun wũhni nihcan caá. Wã wẽpatjĩh nihcan jĩ yeebdíh ã daabánap jĩ. Jesús ã wẽpatjĩh ã daabánap jĩ, áihwã ñi jummat jútat pínah niijná. ¹⁴⁻¹⁵ Crispo wũt jumni,* Gayo wũt jumni,* queét chénewá dihjuh wã daabánap jĩ. Bitadih wã daabácap jĩ. Yeebdíh wã daabánachah nihna, “Pabloboó ã wẽpatjĩh weemdíh ã daabánap jĩ”, ñita niij tágaá. Pánihna, “Queétdih wã daabácatjidih túina caá”, Diosdih wã

* **1:12** Hch 18.24 * **1:14-15** Hch 18.8 * **1:14-15** Hch 19.29; Ro 16.23

niijná caá. ¹⁶ ¡Cáaj! Estéfanaswādh wā quíib b̄ud̄ap be. Queétdihbut wā daabánap jī. Obohjeéhtih, “Bitadh wā daabácap jī”, wā niíj jenah joiná caá.* ¹⁷ Cāacwādh daabáni pínah Jesús weemdíh wahcan, āih táini doonádh naáwát túutna, ā wahap jī. Jwiít cāacwā jwī jenah joyátjīhjih ā naáwát túutcap jī. Páant wā naáwáchah nihna, joinítboó “Caán tá naóhni caá”, niijnít, weemdíhjih ĩta wēi jenah joi tága. Jesúsdh ĩta jenah joicán taga. Obohjeéhtih, Dios ā wēpatjīh yoobópdih āih doonádh weemdíh ā naáwát túutap jī, Jesús cruzboó ā w̄n w̄hatjidih ĩ tái jenah joyát pínah niijná.

Cristo Dios ā jéihyat, ā wēpatdh j̄utni caá

¹⁸ Jwiít Jesús cruzboó ā w̄n w̄hatji doonádh joinít, caandíh jwī jepahachah, Dios ā wēpatjīh jwiítdh ā tái ubna caá. Obohjeéhtih, Jesúsdh jepahcannit iiguípna bejnít pínah, cruzboó Jesús ā w̄n w̄hatji doonádh joinít, nin pah ĩ niíj jenah joiná ȳh caá: “Dedé pínah nihcan jī. Páantjeh āt w̄njehep w̄t jī”, ĩ niíj jenah joiná caá.* ¹⁹ Páant ĩ niiját biíc yoobó Dios naáwádh naóh yapani nin pah āt niíj daacáp tajī:

“Dios nin pah ā niijná caá: ‘Cāacwā ĩ bohéatdhjih tái jéihna ȳhna, weemdíh ĩ jenah joicát jīb ĩ b̄ud̄b̄ipna caá’, ā niijná caá”, āt niíj daacáp tajī. *(Is 29.14)*

²⁰ Diosdh jéihcannit ĩ jenah joyátjīhjih bádí ĩ jéihyechah ȳhna, Dios ĩ jéihyatdh “Dedé pínah nihcan caá”, ā niíj jenah joiná caá. Pánihna, jwiít cāacwā jwī jenah joyátdhjih bohénit, ĩ tái jéihna

* **1:16** 1Co 16.15 * **1:18** Ro 1.16

yuhna, jeáboó ã bejcan niít. Moisés ã wutattjidih bohénit, túi naóhntbut jéihna yuhna, Dios pebhna ã bejcan niít.* 21 Dios nihattidih jéihni jumna, nin pah át niíj jenah joyóp wut jĩ: “Cãacwã ã jenah joyátdihjeh jéihntidih wã túi ubcan niít. Obohjeéhtih, wã wãúh ã wun wãhatdih jenah joinítdihjeh wã túi abbipna caá”, át niijíp wut jĩ. Jesúih doonádih jwĩ bohénachah, jepahcannitboó “Oboh ã naáwátjeh caá”, niíj jenah joinít, buudní ã jumnipna caá.

22 Jwiít judíowã nin pah jwĩpĩ niíj jenah joiná yuh caá: “Dios ã wēpatdih ã júutcah, caandih jwĩ jepahcan niít”, jwĩ niijná caá. Yeéb judíowã nihcannit nin pah ñipĩ niíj jenah joiná yuh caá: “Dios ded pah ã jumattidih jwĩ jenah joyátdihjeh beh joicán, caandih jwĩ jepahcan niít”, ñi niijná caá. 23 Obohjeéhtih, jwiítboó nin pah jwĩpĩ niíj naóh bohéna caá: “Jesucristo cruzboó jwiítidih át wun wãhup tajĩ”, jwĩ niijná caá. Páant jwĩ niíj bohéatdih joinít, jepahcannit judíowã nin pah ã niíj jenah joiná yuh caá: “Obohjeéhtih, Dios ã wahní jwiítidih túi ubni pínah wancanjeh, jwĩ maáh ã jumnipna caá. Pánihna, Jesús wunah bejna, caánboó jwĩ páini nihcan caá”, ã niíj jenah joiná caá. Páant niíj jenah joinít, Jesúih doonádih ã yap yohna caá. Judíowã nihcannitboó nin pah ã niíj jenah joiná yuh caá: “Ï yee naáwátjeh caá”, niíj jenah joinít, queébtbut Jesúih doonádih ã yap yohna caá. 24 Obohjeéhtih, biquína jwiít judíowãdih, yeéb judíowã nihcannitdihbut Dios ã ñíwichah, Jesúih doonádih túi jói jepahnit, nin pah jwĩ niíj jéihna caá: “Dios chah

* 1:20 Job 12.17; Is 19.12; 33.18; 44.25

wēpni, nihat jéihni jumna, cāacwādh tái ubat túut niijná, Jesúsdih át wun wūhat túutur tajī”, jwī niijná caá. ²⁵ Páant ā nīwichah, āihwā jumna, nin pah jwī niij jéihna caá: “Jwiit cāacwā jwī jenah joyát chah Dios át jenah joi tága. Jwiit cāacwā jwī wēpat chah Dios ā wēpna caá”, jwī niijná caá.

²⁶ Páant wā naáwátdih jenah joinít, Dios yeebdíh ā nīwichah, ded pah nī jumatdihbut nī tái jenah joyoó. Wā údwā panihnitá, bita yeebdíh ennit, “Queét bohécannit, dinero wihcannit jumna, oboh jumnit caá”, it niij jenah joyóp tajī. ²⁷ Obohjeéhtih, “Jéihcannitjeh caá”, cāacwā ī niijnítidih Dios át nīwip taga. Pánih nīona, jéihnitboodíh “Búdí bohéna yuhna, wā jéihyat dedé pínah nihcan caá”, Dios queétdih át niij jéihyanap taga. Oboh jumnitdihbut ā nīwichah ennit, “Wā wēpat dedé pínah nihcan caá”, maátadih át niij jéihyanap taga. ²⁸ Oboh jumnit, bita ī deohnit, bita ī enah bojnitdihbut Dios át nīwip taga. Pánih nīonit, “Jwiit cāacwā jwī jéihyat weemdíh ā jumachah yuhna, dedé pínah nihcan caá”, jwiitdih át niij jéihyanap taga. ²⁹ Pánihna, Dios pehbhoó juibínit, “Wā jéihyatjīhjah wā jūwáp be”, jwī niij jéihcan niit. ³⁰ Obohjeéhtih, Dios caá jwiitdih át teo wáacap taga, Jesucristodih jepahnit, āihwā jwī jumap pínah niijná. Pánih āihwā jumna, Jesús ā jenah joyát pahjah muntih Dios jwiitdihbut ā jenah joyát túutna caá. Ā wun wūhatdih jwī tái jenah joyóchah, jwiit āihwādh “Caánboó túini caá. Wā peéh chājcan niit”, Dios ā niij enna caá. ³¹ Nin pah Dios naáwátdih naóh yapani át niij daacáp tajī: “Weemdíh dedé jedhdad wihcan caá’, niijnít ī jumca bojo naáh. Obohjeéhtih ‘Jwī Maáh Dios nihat

jéihni, weemdíh ã táí teo wáacap be', niijnít ï j̄um̄u naáh", ãt niíj daacáp tajī. *

2

Cristo ã w̄un w̄ahatji

1-2 Wã úudwã panihnitá, ñi pebhna jwíih j̄uibína, ded pah wã j̄umatjidih ñi táí náhninaá. Ñi pebhoo wã bejat pínah jãtíh nin pah wã niíj jenah joyóp jī: “Jesucristo ded pah ã j̄umatjidih bohéna, jwiít dih ã w̄un w̄ahatjidih queétdih wã jéihyabipna caá”, wã niíj jenah joyóp jī. Páant niíj jenah joinít, Dios weemdíh ã jéihyani doonádih táinijeh yeebdíh wã naóh bohénap jī, “Pablo nihat jéihni caá”, ñi niíj jenah joicát pínah niijná. ³ Ñijeéh j̄umna, nin pah wã niíj jenah joyóp jī: “¿Yoobópdih niít wã bohénap? ¿Jesúsdih ï táí jepahmi naniít? ¿Jepahcan, íijnit, weemdíh ï yoh bacami naniít?” niíj jenah joinít, búdí wã úumap jī.* ⁴ Jwiít cáacwã jwí jenah joyátjīhjah wã naóh bohécap jī. Obohjeéhtih, Túini Espíritu ã wēpatjīh yeebdíh táinijeh wã bohénachah joinít, Dios ded pah ã wēpatdih ã j̄úutuchah ennit, Jesúsdih ñi jepahap jī. ⁵ Pánihna, “Pablo ã táí jéihyatjīhjah jwiít dih ã jepahat túutcap jī. Obohjeéhtih, Dios ã wēpatjīh ã chãj j̄úutuchah ennit, Jesúsdih jwí táí jenah joyóp jī”, ñi niiját pínah niijná, páant wã bohénap jī.

Túini Espíritu ded pah Dios ã j̄umatdih ã jéihyaat

6-7 Diosdih jéihcannit ï jenah joyát dedé pínah nihcah, Diosboodíh táí jenah joyát caá náahap. Diosdih táí jenah joinít dih nin pah wãpĩ niíj naóh

* **1:31** Jer 9.23-24 * **2:3** Hch 18.9

bohéna caá: “Dios nihat jéihni jumna, jwiít dih táí ubat túut niijná, Jesús dih át wahjip taga. Pánih chājna, jeáboó jwī jubínachah, chah táinidihbut jwiít dih ā chāj bipna caá”, wāpī niīj naóh bohéna caá. Nin baác dih moón maáta ī jenah joyát chah Dios ā jenah joyát caá. Queétboó ī wunuchah, ī jenah joyátjidi bita ī náhnican niít. Obohjeéhtih, Diosboó nin baác dih ā chājat pínah jātih, Jesús dih ā wah deyaat pínah dih átát jenah joijíp taga. Jon jātih páant niīj jenah joiná yuhna, jwiít cāacwā dih át jéihya jwuhcap taga. ⁸ Páant ā jenah joyátjidih nin baác dih moón ī maátaboó ít beh joicáp jī. Ī beh joiná nihna, nihat jéihni, chah wēpni, jwī Maáh Jesucristodih ĩta mao yohcan taga. ⁹ Dios páant ā niīj jenah joyátjidih cāacwā ī beh joicáh yuhna, ā naáwát dih naóh yapani nin pah át niīj daacáp tajī:

“Caandíh oinit dih ded pah Dios táini ā chājat pínah dih jwiít cāacwāboó encan, joicán, jwī jenah joi jwúhcan caá. Ded pah jwī jenah joyát chah ā táí jumbipna caá”, át niīj daacáp tajī. *(Is 64.4)*

¹⁰ Páant ā jéihya jwuhcah yuhna, ā jenah joyátjidih buu jwuhna Túini Espírituboó jwiít dih ā jéihyana caá. Caán Túini Espiritu nihat jéihni, Dios ā jenah joyát dih ā táí jéih beedána caá.

¹¹ Jwiít cāacwā biíh ā jenah joyát dih jwī jéihcan caá. Caanjéh caá ā jéihyep. Pánihat pah, jwiít cāacwā Dios ā jenah joyát dih jwī jéihcan caá. Āih Túini Espiritujeh caá caandíh ā jéihyep. ¹² Dios dih jéihcannit ī jenah joyát pah jenah joiná, Dios ā jenah joyát dih jwī beh joicán caá. Páant jwī beh joicáh, āih Túini Espiritu dih jwiít dih Dios ā wūhup

jĩ, ded pah oinit, ã táí chãjatjidih jwĩ jéihyat pínah niijná. ¹³ Páant ã jéihyanachah, ã wēpatjĩh jwiítbüt yeebdíh jwĩ jwúub bohéna caá. Diosdih jéihcannit ĩ jenah joyát pah jenah joinít, jwĩ bohécan caá. Obohjeéhtih, Túini Espíritu ã jéihyanachah, bitadih jwĩpĩ bohéna caá.

¹⁴ Jesúsdi h jepahcannit, Túini Espíritu wihcannit, caán ã bohéatdih náahcan, “Dedé pínah nihcan caá”, ĩ niúj jenah joiná yuh caá. Pánihna, Túini Espíritu ã teo wáacchah, ã bohéatdih queét ĩ jéih beh joicán caá. ¹⁵ Túini Espíritu ã teo wáacachah, Dios ded pah ã bohéatdih jwiít Jesúíhwã jwĩ jéih beh joiná caá. Pánih beh joiná, ã weñat pínahdih jwĩ jéih chãjna caá. Obohjeéhtih, Jesúsdi h jéihcannitboó páant jwĩ chãjachah ennit, Dios ã weñat pínahdih beh joicán, “¿Dépanih tigaá queétboó páant ĩ chãj?” ĩ niijná caá.

¹⁶ Páant ã jummat pah jon jãtĩh Dios naáwãtdih naóh yapani Isaías nin pah ãt niúj daacáp tajĩ:

“Dios nihat jéihni ã jumuchah, jwiít cãacwãboó ded pah ã jenah joyãtdih jwĩ jéih beedácan caá. Pánih jéihcannit jumna, caánboodíh jwĩ jéih bohécan caá”, ãt niúj daacáp tajĩ.*

Obohjeéhtih Túini Espíritu ã teo wáacachah, jwiítboó Jesucristo ded pah ã jenah joyãtdih jéihna, ã weñat pínahdih jwĩ jéih chãjna caá.

3

Pablo, Apolosjĩh Diosdih oboh teo wãhñitjeh ĩ jummat

¹ Yeéb wã úudwã panihnitá, Jesucristodih jepahna yuhna, páantjeh jáap jéihnit pah ñi jumna

* **2:16** Is 40.13; Ro 11.34

caá. ² Yeebdíh maatápdih wã bohénachah yuhna, wébít páantjeh nom jwuhnit dée pah ñi jumna caá. Páant ñi jumachah, ñi túi beh joyát pínah niijná, buocannidihjeh yeebdíh wã naóhna caá. Pánihna, nom jwuhnitdih jeémátdih jwĩ wãhcat pah, buoni bohéatdih yeebdíh wã jéih naóh jwuhcan caá. ¿Dépanihna, páant ñi jum?*

³ ¿Dépanihna Túini Espíritu wihcannit pah Dios ã weñat pínahdih ñi chãjcan? Túini Espíritu wihcannit pah jumna, tubit míic jũhnit, míic íjanitbut ñi jumna caá. Jesucristodih jepahcannit biíc yoobó ñi chãjna caá. ⁴ Yeéb biquína “Weém Pabloíh caá”, niijnít, bita “Weém Apoloíh caá”, niijnít, tubit ñi míic íjana caá. Pánih míic íjana, Diosdih jéihcannit dée pah ñi jumna caá.*

⁵ Biquína “Pablo caá chah jéihni”, niij jenah joí, bitabut “Apolos caá chah jéihni”, ñi niij jenah joiná caá. Páant ñi niij jenah joicá bojoó. Jwiít bohénit nihat biíc yoobó Diosdih teo wãhnitjeh jwĩ jumna caá. Ded pah ã wutuchah, caandíh jepahnitjeh, yeebdíh jwĩ bohénap jĩ. Páant ã wutuchah, jwĩ bohénachah joinít, Jesucristodihjeh yeéb ñi jepahap jĩ. ⁶ Nin pah ã jumna caá: Pácahidih momni dée, weém jĩí yeebdíh Jesúih doonádih wã jwíh naáwáp jĩ.* Páant ã momat túttimah, pácahi en daoní dée, Apolos yeebdíh ã jwúub bohénap be, chah ñi jéihyat pínah niijná.* Obohjeéhtih, momnidih Diosjeh chíhanit, ã behana caá. Pánihat pah Diosjeh túut nuumát túutnit, yeebdíh ã jéihyana caá. ⁷ Momni, en daoníbut oboh jumnitjeh caá. Diosjeh

* **3:2** He 5.12-13 * **3:4** 1Co 1.12 * **3:6** Hch 18.4-11 * **3:6** Hch 18.24-28

ã chíihana caá. Pánihna, weém wã táí naáwáchah yuhna, Apolosbut ã táí bohénachah yuhna, Dios yeebdíh ã jéihyacah, ñita beh joicán tagaá. Páant ñi beh joicán, caandíh ñita jepahcan tagaá. ⁸ Pácahidih momni, en daoníbut, Dios ã enechah, biíc yoobó ĩ jamna caá. Dios ã wēpatjĩh biíc ã táí bohéatdih ennit, ã pehbboó ã juibínachah, Dios chah ã jíib chāj bipna caá. Obohjeéhtih biíhboó ã táí bohécatdih ennit, namp ã jíib chāj bipna caá. ⁹ Jwiít nihat Dios ã wutadnih jepahnit, yeebdíh jwĩ bohéna caá. Yeébboó Dioíh pácahi dée, áih mʉú dée ñi jamna caá. ¹⁰ Dios weemdíh ã táí teo wáacachah, weémboó yeebdíh wã jwíih bohénap jĩ. Mʉú chājna, túini jíhlo jwio náhdih ñíonit, ĩ dodhdad dée, weémboó yeebdíh wã jwíih táí bohénap jĩ. Túttimah, mʉú chājnit dée bita yeebdíh ĩt jwʉub bohénap taga. Túini mʉú chājnit dée, jwiít bohénitboodíh Dios ã wēpatjĩhjuh táí bohéat caá náahap. ¹¹ Túini jagáp nahdih ĩ dodhdad dée, Jesucristo ã wan wūhatjidih wã jwíih bohénachah, ñi jepahap jĩ. ¹² Maatápdih jamni pínah mʉudíh chājíhna, túini máa nahnadih ñíonit, túi chājat caá náahap. Pánihat pah, yeéb Dioíh mʉú dée ñi jamuchah, ñi jepah cádahcat pínah niijná, wã túttimah jūóhndih Túini Espíritu ã wēpatjĩh yoobópdih bohéat caá náahap. ¹³⁻¹⁴ Pánih chājna, Jesús jwʉub dei jūóhna, mʉudíh ĩ táí chājat dée, ĩ táí bohéatji jíib, Dios ã táí chāj bipna caá. ¹⁵ Obohjeéhtih, mʉudíh ĩ táí chājcat dée, ĩ táí bohécatji jíib, ã táí chājcan níit. Queét táí bohécannitboó Dios pebhna ĩ juibínachah yuhna, Túini Espíritu ã teo wáacatjĩh ĩ bohécah, Dios queétdih ã táí chājcan níit. ¹⁶ Pánihna, “Jwiít biícđih

Dioih muú dée jwĩ jumuchah, Túini Espiritu jwĩjeéh ã jumna caá”, ñi niij táí jenah joyoó.* 17 Pániñ jumna, ãihwãjeh jwĩ jumuchah, ded yeéb biíc dih ñi jumatdih ã yééjanachah, Dios caandih búdí ã peéh chãjbipna caá.

18 Biquína nin pah ñi niij jenah joiná caá: “Weém táí jéih beedáni caá. Dedé weemdih judhcan caá”, ñi niij jenah joiná yuh caá. Obohjeéhtih, páant niij jenah joinít, yeebjéh ñi míic yeena caá. Páant ñi niij jenah joyátdih yeebdih cádahat caá náahap. Pániñ cádahnit, túut numná, nin pah ñi jwúb niij jenah joyoó: “Weém bainí jéihnijeh jumna, yoobópdih jéihyat túut niijná, Dios ã teo wáacatdih búdí wá náahna caá”, ñi niij jenah joyoó. 19 Diosboó caandih jepahcannit ded pah ñi jenah joyátdih ennit, “Dedé pínah nihcan caá”, ã niijná caá. Páant niijná, nin pah jon jãtíh ãt niij daacát túutap tají: “ ‘Jwiít chah jéihnit caá’, niij jenah joinít dih wá yohbipna caá”, ãt niij daacát túutap tají.* 20 Davidjiboodih biíc yoobó nin pah ãt niij daacát túutap tají: “Weemdih jéihcannit ñi jenah joyátdih ennit, ‘Dedé pínah nihcan caá’, ãt niij daacát túutap tají.* 21-22 Biquína yeéb nin pah ñi niij jenah joiná yuh caá: “Pablo chah jéihni ã jumuchah, weém ãih jumna, weembát chah jéihni wá jumna caá”, ñi niij jenah joiná caá. Bitabut Apolosdih, Pedrodihbut biíc yoobó ñi niij jenah joiná yuh caá. Obohjeéhtih, páant ñi niij jenah joyát yoobópdih nihcah, túut numát caá náahap. Yeéb jwíihwã nihcah, jwiít yeebdih bohénitboó ñíihwã jwĩ jumna caá. Dios jwiít dih

* 3:16 1Co 6.19; 2Co 6.16 * 3:19 Job 5.13 * 3:20 Sal 94.11

yeéb nihatdih át wāhup taga. Páant yeebdíh ã wāhuchah, jwiít nihat yeebdíh teo wáacnit jwĩ jumna caá. Yeebdíh teo wáacnitdih wāhnit, nin baácboó ñi jum jwuhuchah, páantjeh ã túi chājipna caá. Wannit, ã pebhboó ñi juibínachah, chah túini ã wāhbiipna caá. Buu láa Dios yeebdíh túi teo wáacna, túttimah bóo láabut, chah ã teo wáacbiipna caá. Pánihna, nihat túini ã wāhni ñíih ã jumna caá. ²³ Yeéb Cristoíhwā jumna, caánboó Dioíh ã jumuchah, yeebbát Dioíhwā ñi jumna caá.

4

Cristo ã naáwát túutnit ded pah í jumat

¹ Jwiít yeebdíh bohénitdih “Queét Jesucristodih teo wāhnitjeh caá. Dios cāacwādh ã jéihya jwahca naáhdih Pablowādh át bohé jibat túutap taga”, níj jenah joyát caá náahap. ² Det teo wāhnitdih í maátadijeh túi jepahat caá náahap. Pánihat pah, jwiít Jesúsdih teo wāhnit jumna, jwĩ Maáh ded pah ã bohéat túutuchah, jwiít dih yoobópdih bohéat caá náahap. ³ “Caán Pablo túi yoobópdih ã bohécan caá”, yeéb ñi níijichah yahna, weémboó wā jġahcan caá. Bitabut biíc yoobó í níijichah yahna, biíc yoobó wā jġahcan níit. Weemjéhbat “Dios ã bohéat túutatjidih wā túi bohécan beé”, wā níj jenah joicán caá. ⁴ “Diosdih jepahnit, yoobópdih wā bohécan caá”, níj jenah joicán yahna, “Weém túi yoobópdihjeh bohéni caá. Dedé yéejat jġib weemdíh ã wihcan caá”, wā jéih níjicán caá. Jwĩ Maáh Jesucristojeh weemdíh ennit, “Meém ma túi bohénap be”, níjini pínah caá.* ⁵ Jwĩ Maáh Jesús

* **4:4** 1Jn 3.19-21

ã jwúub dei júúwát pínah jãtìh, yeéboó ded pah jwĩ bohéát, bita ì chãjatdihbut ennit, “Caánboó jwĩ Maáh ã watatdih ã túi chãjcan caá”, niijcát caá náahap. Obohjeéhtih, jwúub dei júóhnit, Jesúsboó ded pah jwĩ bohéátjidih jwiítidih ã naóhbipna caá. Jwiít cãacwãboó ded pah biíh ã chãjatdih, ã jenah joyátidihbut jwĩ jéihcan caá. Jwiítjehbut jwĩ jenah joyátidih jwĩ jéih beedácan caá. Diosjeh caá ã jéihyep. Pánihna, Jesús jwúub júóhnit, nihat jwĩ chãjatjidih, nihat jwĩ jenah joyátjidihbut ã naóhbipna caá. Caán láajeh caá “Meém ma túi chãjap jĩ”, jwiítidih ã niij naóhbipna caá.

⁶ Wã úudwã panihnitá, pánih naóhna, ñi túi beh joyát pínah niijná, ded pah jwiít Apolosjĩh jwĩ jummatdihjeh wã naáwáp be. Ded pah jwĩ jummatdih ennit, biíc yoobó yeebbút ñi jéih jumbipna caá. Dios ã daacát tútatdih jepahna, “Yeebdíh bohéni ã jéihyat chah jwiítidih bohéni ã jéihna caá. Pánihna, meém ma jéihyat chah caá wã jéihyep”, ñi míic niijcá bojoó ⁷ “Caán bohéniboó chah jéihni ã jumuchah, caandíh caá jwĩ náahap”, ñi niijcá bojoó. Nihat ñi bíbohatdih Dios yeebdíh wãhnijeh caá. Jwĩ bohéátidih ñi joyóchah, Dios caá yeebdíh át beh joyánap taga. Ñi jenah joyátjĩhjeh ñi beh joicáp be. Pánihna, ì jéihyatjĩhjeh beh joinít dée, yeebdíh nin pah niijcát caá náahap: “Weemdíh bohéni túi jéihni ã jumuchah, weembút túi jéihni jumna, Jesúih doonádih weemjéh wã túi beh joyóp be”, niijcát caá náahap.

⁸ Yeéb nin pah ñi niij jenah joiná caá. “Jwiítboó Dioíh doonádih túi jéih beedánit caá. Jwiítidih dedé jedhdat wihcan caá. Túini Espíritu nihat ã wãhni

wēpat jwiít dih ã jumna caá. Pablowã ï wihcah yuhna, jwiítjeh maáta jwĩ jumna caá”, ñi niíj jengah joiná yuh caá. Obohjeéhtih, jwĩ Maáh Jesús ã jwáub dei jūwúchah, caán biíc dih maáta yoobópdih ñi jumuchah, áta túi taga. Pánih jumna nihna, jwiítbut ñijeéh maáta jwĩta jum taga. Nihat yeejép yapat áta péa taga. Obohjeéhtih, páant ã yap jwuhcan caá. ⁹ Weémboó nin pah wã niíj jengah joiná caá: “Jwiít Dios ã naáwát tútnitdih oboh jumnit, peéh mawat pínahdih páinit pah bitaboó ï enna caá. Nihat cãacwã, nihat Dioíh ángelwãbut ded pah jwiít dih ã yapat pínahdih jéihyat túut niijná, jwiít dih enna caá ï chãjap”, wã niíj jengah joiná caá. ¹⁰ Pánih ennit, “Jesucristoíh doonádih naóhna, queét dedé pínah nihcan caá”, jwiít dih ï niíj enna caá. Obohjeéhtih, “Queét Jesúsíhwã jumna, dedé jéihcat pínah wihcan caá”, yeébbodíh ï niíj enna caá. “Queét wēp naóh nit nihcah, queétdih jwĩ jepahcan niít”, jwiít dih ï niíj jengah joiná caá. Obohjeéhtih, “Queét ï túi wēp naáwáchah joinít, nihat cãacwã ï túut nuumbípna caá”, yeébbodíh ï niíj jengah joiná caá. Pánihna, dawá yeébdíh wēi naóh nit, jwiítboudíh ï iiná caá. ¹¹ Jwiít jwĩ bohé jibichah, nuugúp tubna, ãpĩ taca joót na caá. Jwiít dih túini yégueh wihcan, muubút wihcan caá. Jwĩ naáwáchah joinít, íjna, jwiít dih dawá láa bita ï mawap be. Jwĩ jib bohé jwíhipmant, buubut biíc yoobó ã yapna caá. ¹² Jwĩ náahatdih jíib chãjat túut niijná, búdí teonit, jwĩpĩ chuná caá.* Cãacwã jwiít dih yeejép ï naáwáchah joinít, yeejép naóh jwúbacanjeh, Dios queétdih ã teo wáacat pínahdih jwĩpĩ ubhna caá.

* **4:12** Hch 18.3

Yeejép ï chãjachah yuhna, jwĩpĩ enah bojna caá. ¹³ Yeejép dooná ï naáwáchah joinít, “¿Biíc dih jwĩ jéih jumcan niít?” jwĩpĩ niíj jwúubana caá. Nihat cáacwã ï yohni pah jwiít dih ïpĩ enna caá. Jwĩ bohé jwíhipmant buubut biíc yoobó jwiít dih ï jenah joiná caá.

¹⁴ Caandíh daácna, ñi tíicat pínah nihcan, yeéb wã weh panihnit dih oina, ñi túat nuumát pínah dih náah yacnit, páant wã niíj daacáp be. ¹⁵ Nin wã naáwát pínah dih ñi jenah joyoó: Weém ñi íp panihni caá. Yeebdíh wã bohéat túttimah, dawá Jesúíh doonádih bohénit ï jumuchah yuhna, weemjéh beé yeebdíh jwíih naóhni. Páant wã jwíih naáwáchah joinít, Jesucristodih ñi jepahap jĩ. ¹⁶ Ñi íp panihnih yeebdíh oinit, páant wã niíj naáwáp be. Ì mána ded pah ï jumat dih ennit, wébítbut biíc yoobó ïpĩ chãjna caá. Pánihna, ñi íp panihni ded pah wã jumat dih ennit, yeebbút biíc yoobó ñi chãjaá.*

¹⁷ Páant ñi chãjat pínah dih náah yacnit, Timoteodih ñi pebhna wã wahna caá. Jesúíh doonádih wã naáwáchah joinít, caanbút ã jepahachah, wã wúuh pah wã oini ã jumna caá. Nihat tútchinadih moón Jesúíhwã dih ded pah bohéna, biíc yoobó wãpĩ chãjna caá. Ded pah wã chãjachah enniji yeebdíhbut ã jwúub náhniabipna caá. ¹⁸ Obohjeéhtih, biquína yeéb nin pah ñi niíj jenah joiná caá: “Jwiít chah jéihnit caá. Dedé pínah Pablo jwiít dih ã jéih bohécán niít. Jwiít dih úumnit, ã júóhbican nacaá”, ñi niíj jenah joiná yuh caá. ¹⁹ Obohjeéhtih, jwĩ Maáh ã wahachah, waícanjeh ñi pebhna wã juibíbipna caá. Juibínit,

* **4:16** 1Co 11.1; Fil 3.17

páant niij naóhnitabeh ded pah ï chãjatdih wã enbipna caá. Jesúih doonádih ï naáwáchah, ¿Bita ï túut nuúm niit? ¿Oboh ï niijátjeh caá? ²⁰ Queét Dios ã wēpatjĩh yoobópdih ï naáwáchah, queétdih joinítboó jepahnit, ï túut nuumbípna caá. Obohjeéhtih, páantjeh ï naáwáchah, cãacwã ï jepahcatdih wã jéihbipna caá. Jesúihwã jumna, ded pah naóhna, Dios ã wēpatjĩh ï chãjbipna caá. Oboh naóhna, ï chãjcan niit. ²¹ Pánihna, ñi pebhna jubínit, wã jãihñatdih náahcan, ñi túut nuúm páñaá. Páant ñi túut nuumúchah, ñi íp pah yeebdíh oinit, chãihjeh wã naóhbipna caá.

5

Yeejép yoobát pohba chãjnidih ï yohat pínah

¹ Bũũ yeebdíh bainí wã jwúub naáwát túut caá. Ñi pebh chah yeejép chãjat doonádih wã joyóp be. Ñi cãtíh tubit yéj chãjni ã íp áadihjih át bíbohóp wut be. Jesúsdih jéihcannit páant yeejép ïpĩ chãjcan caá. Obohjeéhtih, yeéboó Jesúsdih jéihnit jumna yuhna, páant ã chãjatdih ñi enah bojna caá.* ² “Jwĩ Maáhdih túi jepahnit, jwiít dih dedé yéejat wihcan caá”, niij jenah joiná yuhna, tíccan, jĩgahcan, caán yeejép chãjnidih ñi túut nuumát túutcap be. Páant ñi túut nuumát túutcan, bũũ páantjeh ã yéj chãjat jíib, yeéb ñi míic wáac jubínit, caandíh ñi jwúub waadát túutca bojoó. ³ Weémboó ñijeéh wihcan yuhna, caán doonádih joinít, búdí uúbhna wã chãjap be. Pánihna, ñijeéh wã jumat pahjeh, ded pah caandíh ã yéejat peéh chãjat pínahdih Jesús weemdíh ã jéihyanap be. ⁴⁻⁵ Páant ã jéihyanachah, nin pah

* 5:1 Dt 22.30

yeebdih wã niij naóhna caá: Caandih ã yéejat peéh naáwát túut niijná, yeéb ñi míc wáacá. Pánih míc wáacna, ñijeéh wã jumat pah, Jesús ã wēpatjīh nin pah caandih ñi niiji: “Jwī jwúub míc wáacachah, ma waadcá bojoó. Nemépwã ī maáh ded pah meemdih yeejép ã chājīhna, ã chāja naáh, ma jwúub túut nuumát pínah niijná. Pánih túut nuumnit, Jesús ã jwúub dei jūwúchah, ájeéh ma bejat pínahdih meemdih jwī náah yacna caá”, caandih ñi niiji.

6 Pánih yéej chājni ñijeéh ã míc wáacachah, yeéboó “Jwiit Jesúhwã jwī táí jumna caá”, ñi niij jenah joyóchah yuhna, ã táican caá. Nin pah jwīpī niij naáwátdih ñi táí jéihna caá: “Búdī pan pínahdih ã paáát pínah bainíbitjeh jwī widichah yuhna, nihat āpī paa béjna caá”, jwī niijná caá. Pánihat pah, biícjeh ã yéejatdih cádahīhcan, nihat Dioíhwã biíc dih míc wáacna, queétdihbut ã yéejabipna caá.* 7 Jwiit judíowã Pascuadih jeémát pínah chājnit, nihat paáát pínahdih jwīih muumánt yohnit, paacánni pandihjeh jwīpī chājna caá. Diosdih jwīpī mao wāhni oveja wūh pah, Dios ã enechah, yéejat wihcannit jwī jumat pínah niijná, Jesucristo jwiít dih át wan wūhup tajī. Pánihna, paáát pínahdih jwī yohat pah yeebdihbut nihat ñi yéejatdih, ñi cātīh jumni yéejat cádahīhcannidihbut yohat caá náahap. Pánih yohna, paacánni pan dée, Dios ã enechah, yéejat wihcannit ñi jumbipna caá.* 8 Pánihna, táí wēinit, biíc dih jumat túut niijná, nihat yeejép chājatdih, yeejép jenah joyát dihbut cádahnit, yoobóp dih jenah joinít, jwiít dih táí chājat caá náahap.*

* 5:6 Gá 5.9 * 5:7 Ex 12.5 * 5:8 Ex 13.7; Dt 16.3

9 Wã jwíih daác wahní náodih wã niijátji pah muntih, buu wã jwúub niij daácna caá, ñi táí beh joyát pínah niijná. “Í áa nihcannitjĩh yeejép chãjnit biícđih ñi jumca bojoó”, wã niij daacáp jĩ. 10 Páant niij daácna, “Jesúsdih jéihcannit yeejép chãjnit”, niijná wã chãjcan be. “Jesúsdih jéihcannit bií déedih en ñinahnitdih, numnítđih, pãpnidih úbhñitđihbut”, niijná wã chãjcan be. Pánih chãjnit nihat pehbboó í jumna caá. Íjeéh jumíhcan, dedboó ñi jweyát pínah áta wihcan taga. 11 Obohjeéhtih, nin pah niijná wã chãjap be: “ ‘Weém Jesúh caá’, niijná yuhna, nin pah chãjnit biícđih ñi jumca bojoó: í áa nihcannitjĩh yeejép chãjnit, en ñinahnit, pãpnidih úbhñit, bitadih yee naóh yacnit, máihñit, numnít í jumachah, queét biícđih ñi jumca bojoó”, niijná wã chãjap be. Pánih chãjnitđih numah jeémpcat caá yeebdih náahap. Queétbut yeebdih í numah jeémíhichah, ñi jepahca bojoó. 12-13 Weém Jesúsdih jéihcannitđih í yéejat peéh wã chãjcan niít. Diosboó queétdih ã peéh chãjbipna caá. Obohjeéhtih jwíjeéh wáac junít Jesúhwã í yéej chãjachah, jwiitboó queétdih peéh chãjat caá náahap, í táí túut numát pínah niijná. Pánihna, ñijeéh jumni tabit yeejép chãjnidih ñi yohoó. Caandih ñijeéh biícđih ñi jumát túutca bojoó.*

6

Jesúhwãjeh míic ámohat

1 Buu biih yeejép yapat doonádih joinít, bainí wã naóhbipna caá. Yeéb Jesúsdih jéihñit jumna yuhna, chénewã míic jãihñit, ¿Dépanihna, ã yoobáát

* 5:12-13 Dt 13.5; 17.7

pínah niijná, Jesúsdiŋ jéihcanni maáh pebhboó ñi bej? Jesúsdiŋ jéihni pebhna ñi bejechah, yeebdíh ã túi yoobáát pínah niijná, Dios caánboodíh áta teo wáac taga. ²⁻³ Nindih ñi túi náhninaá: Jwĩ Maáh Jesús ã jwáub dei júúwúchah, yéejnitdiŋ caán biícđih jwiít áihwāboó jwĩ wutbipna caá. Ángelwādiŋbut jwĩ wutbipna caá. Nin baácboó jwĩ jum jwuhuchah, ¿Dépanihna, bainí míic jūihñat ã jumuchah yuhna, yeéb Jesúihwājeh ñi jéih yoobácan? ⁴ Queét maátadiŋ wēi encan yuhna, ¿Dépanihna, niŋat yeéb Jesúihwā míic jūihñit, ĩ yoobáát pínah niijná, queéđihjeh naáwáđih ñipĩ bej? ⁵ Ñi tíicat pínah niijná, nindih wā naóhna caá: “Jwiít túi jéihñit caá”, niŋ jenah joiná yuhna, míic jūihñitdiŋ naóh yoobáni pínah ñijeéh ã wiŋcat pah ñi jumna caá. ⁶ Jesúihwā míicjeh míic jūihñit, Jesúsdiŋ jéihcannit maáta pebhna naáwáđih bejna, Jesúsdiŋ jepahcannitbut ĩ joyóchah, ñipĩ naóh yacna caá. ¿Pániŋ chājna, ñi tíiccan niít?

⁷ Yeéb Jesúihwā míicjeh míic jūihñit, yeebdíh yoobáni pínah maátadiŋ ñi bid bejechah, ã túican caá. Caanná bejcanjeh, yeebjéh ñi yoobánachah, áta túi tagaá. Obohjeéhtih, jéih míic ámohcan, “Á jumna naáh”, ñi niŋjíchah, chah áta túi tagaá. Bitá ĩ jéih chāj nūumáchah, yeebjéh ñi jéih yoobácah, “Á jumna naáh”, yeebdíh niŋját caá náahap. ⁸ Obohjeéhtih, páant niŋcánjeh, yeébboó chah yeejép ñipĩ chājna caá. Bitá ĩ yeejép chājatdiŋ, ĩ jéih chāj nūumáđdiŋ, biíc yoobó yeéb ñipĩ chājna caá. Yeéb Jesúihwā míic jumna yuhna, páant ñipĩ chājna caá.

⁹⁻¹⁰ Nindih ñi túi náhninaá: Det yeejép chājñit

Dios pebhboó ï bejcan niít. Yeebjéh míic yeecanjeh, yoobópdiñ ñi jenah joyoó. Nin pah chãjnit, Dios pebhboó ï bejcan niít: í náah chãjnit, pãpnidih wãbhnit, ï áa nihcannitjñh yéej chãjnit, neoná míicjeh chãjnit, yaádh míicjeh chãjnit, nũũmnít, bíí déedih en ñinahnit, máihnit, bitadiñ yeejép doonádiñ táoh naóhñit, jéih chãj nũũmnítbũt Dios pebhboó ï bejcan niít. ¹¹ Páant ï chãjat pah biquína yeébbó ñi jũmũp jñ. Obohjeéhtih, Jesucristodiñ ñi jepahachah, ã wũn wãhñit, ñi yéejatdiñ át yohop taga. Pánihna, bũũ, Túini Espiritu ã teo wáacachah, Dioíhwã ñi jũmũchah, yeebdíh yéejat jíib ã wihcan caá.

Jwñih bácahñih yéej chãjcat caá náahap

¹² Bũũ bíih yeejép yapatdiñ bainí wã naóhbiñna caá. Biquína yeéb “Jesucristodiñ jepahni jũmna, ‘Ma chãjca bojoó’, niiját weemdiñ ã wihcan caá”, ñi niij jenah joiná yũh caá. Obohjeéhtih, jwñ yéej chãjachah, ã túican caá. Bíih jwñ chãjachah, túini jũmna yũhna, jwñih bácahdiñ, jwñ jenah joyátdiñ yéejana, jwiítidiñ ã teo wáaccan caá. Biquí láana, páant chãjatdiñ cádahíhna yũhna, jwñ jéih cádahcan caá. Páant chãjcat caá jwiítidiñ náahap.* ¹³ “Jwñih wũdah jeémp yacat píñah caá”, niijnít, nũũgũp tubũchah, jwñpí jeémpna caá. Páant jwñ chãjachah, ã túina caá. Nin baácboó jũm jwũhna, bid jeémpna, jwñ túi jũmna caá. Obohjeéhtih, Dios pebhboó jwñ jũmũchah, bid jeémát ã wihcan niít. Biquína “Jwñih bácah yaáhdih metat píñah caá”, ñi niij jenah joiná yũh caá. Obohjeéhtih, páñihcan caá. Dios jwñih

* 6:12 1Co 10.23

bácahdih chājna, caandíh jwĩ teo wūhat pínah ni-ijná, át chājap tajī. Caanjéh caá jwĩ Maáh. ¹⁴ Dios Jesucristodih boo p̄ad jūúwát túatnit, jwiít dihbut biíc yoobó ā wēpatjīh ā boo p̄ad jūúwát túatbipna caá.

¹⁵⁻¹⁶ Nindihbut ñi túi náhninaá: Jwiít Jesúihwā jumna, caán biíc dih biíc bácah dée jwĩ jumna caá. Génesisboó Dios nin pah át niīj daacát túatup tajī: “Newé yadjīh biíc bácah dée ĩ jum b ipna caá”, át niīj daacát túatup tajī.* Caandíh jéihnit, nin pahbut yeebdíh túi náhniat caá náahap: Ded newé yadjeéh ā jumuchah, queét biíc bácah dée ĩ jumna caá. Pánihna, deoh nah jumnih wilijeéh ñi jumuchah, mijeéh biíc bácah dée ñi jumna caá. Mi jenah joyát pahjeh, yeebbút ñi jenah joibípna caá. ¿Dépanihna yeéb Jesúihwā, ájeéh biíc bácah dée jumna yuhna, yeejép wilijeéh biíc bácah dée ñi jumíh? Páant chājat yeejép caá. ¹⁷ Obohjeéhtih yeébboó Jesúihwā jumnit, ájeéh biíc bácah dée jumna, Túini Espiritu ñíih caolihboó ā jumuchah, caán ā jenah joyát pahjeh yeebbút ñi jenah joiná caá.

¹⁸ Yeebdíh ñi áa nihcannitjīh yeejép chājcat caá náahap. Pánih yéej chājnit nihna, chah jwīih bácahdih, jwĩ jenah joyátdihbut jwĩ yéejana caá. Páant jwĩ chājat túttimah, jwiít dih túut nūmát chah ā buona caá. Dedé biíh jwĩ yéej chājachah yuhna, túut nūmát nūmp ā buona caá. ¹⁹⁻²⁰ Nindih ñi túi náhninaá: Jwīih caolihboó ā jumat pínah niijná, Dios jwiít dih Túini Espiritudih át wahap jī. Páant ā wahachah, jwiítboó áih mūu pánihni caá jwĩ jumup.* Dios Jesucristodih wah deyanit, jwiít dih

* **6:15-16** Gn 2.24 * **6:19-20** 1Co 3.16; 2Co 6.16

ã wun wũhat pínah niijná, jwiít dih ã jíib chãjap jĩ, ãihwã jwĩ jummat pínah niijná. Pánih ãihwã jumna, caán jwĩ maáh ã jumachah, jwĩ weñat pínahdih jenah joicánjeh, ã weñat pínahdihjeh chãjat caá náahap.

7

Téihya chéwat

¹ Bũũ weemdih ñi wũbh joí daacátjidih wã jepahbipna caá. Nin pah ñit niij wũbh joyóp tajĩ: “¿Jwiít Jesúsdih jéihnit jwĩ áa jumachah, ã táimi niít?” ñit niij daacáp tajĩ. Páant ñi niij daacátjidih ennit, nin pah wã jepahna caá: Yeéb áa wihcannit ñi jumachah, ã táina caá. ² Obohjeéhtih, páant ñi jumachah, íí náah chãjat ã tobohna caá. Pánihna, yeebdih áa jummat caá náahap. ³⁻⁴ Páant ñi áa jumachah, yaádih bácah miíh pínahjeh nihcan caá. Mijeéh bóoih pínah caá. Pánihna, mi áa mijeéh ã jumíhichah, caántdih jepahat caá náahap. Biíc yoobó newéih bácah ãih pínahjeh nihcan caá. ãjeéh bóliih pínah caá. Pánihna, yad ãjeéh mi jumíhichah, caandíhbut jepahat caá náahap. Pánih chãjna, bitadih ñi bidcan niít. ⁵ “Diosdih túi wũbát túut niijná, biíc dih jwĩ jum jwuhca boj jíih”, ñi míic niijíchah, ã táina caá. Obohjeéhtih, wũbh péanit, túi biíc dih ñi jwũub jumúú. Tubit maatáp dih cádahna, Satanásboó bitadih ã yéej chãjat túutachah, jéih yap yohcanjeh, ñi yéej chãjbipna caá.

⁶ Obohjeéhtih, “Ñi téihya chéweé”, niijnít, wã watcan caá. Áa jumna, áa wihcatbut, biíc yoobó ã táina caá. Ñi íí náah chãjcat pínah niijná, páant wã niij naóhna caá. ⁷ Obohjeéhtih, “Weem páh queét

nihat áa wihcannit ï jumuchah, ãta túi tagaá”, wã niij jenah joiná caá. Biquínadih áa jumat wēpatdih Dios ã wūhna caá. Obohjeéhtih, bitadih áa wihcan yūhna, túi jumat wēpatdihbut ã wūhna caá.

⁸ Būh, áa wihcannitdih, éemp wannitdihbut bainí wã naóhbipna caá. Yeébbóó áa wihcannit ñi jumuchah, ã túibipna caá. ⁹ Obohjeéhtih, yaddih, newédih búdí bidnit, íí náah chājcat túut niijná, ñi áa pínahdih ñi ũbūú.

¹⁰⁻¹¹ Būh, yeéb Jesúhwā áa jumnitboodíh bainí wã naóhbipna caá. Nin wã jenah joyátjeh nihcan caá. Dios ã wūtat caá. Yaádh ï áadih ï cádahca bojo naáh. Neonábut ï weha mána yaáhdih ï yohca bojo naáh. Obohjeéhtih, míic cádahnitji, bííhdih ï áa jumca bojo naáh. Pánih míic cádahnitji queét chénat pahjeh jwūb míic ámohna, bíícdih jwūb jumnit, chah ã túibipna caá.*

¹² Būh, yeéb bitadih jwūh bainí wã naóhbipna caá. Biquína yeéb neoná Jesúsdiñ ñi jepahachah yūhna, ñi weha mána yaádhboó ï jepahcap jī. Yeéb Jesúhwā ñi jumuchah yūhna, ñijeéh ï jumíhichah, ñi yohca bojoó. ¹³ Biquína yeéb yaádhbut Jesúsdiñ ñi jepahachah yūhna, ñi weha mánaboó ï jepahcap jī. Páant ñi jumuchah yūhna, ñijeéh ï jumíhichah, ñi cádahca bojoó. ¹⁴ Yeéb bíic bácah dée ñi jumuchah, bíic Jesúh jumna, bíih Jesúh nihcañ yūhna, Dios yeebdíh ennit, “Queét wíhwā caá”, ã niijná caá. Pánihna, Jesúsdiñ jepahcannit neoná ï weha mána yaádh Jesúsdiñ ï jepahachah, queét neonádihbut Dios ã túi chājbipna caá. Bíic yoobó Jesúsdiñ

* **7:10-11** Mt 5.32; 19.9; Mr 10.11-12; Lc 16.18

jepahcannit yaádh ï weha mána Jesúsdiñ ï jepahachah, Dios queét yaádhdiñbut ã túi chãjbiñna caá. Páant ñi ñumachah, ñi wehdiñ ennit, “Queéñbut wãihwã caá”, Dios ã niijná caá. ¹⁵ Obohjeéñtiñ biguina Jesúsdiñ jepahcannitboó ï weha mána yaádhdiñ, ï weha manadiñbut ïpi cádahíñna caá. Pániñ cádahíñna, míc maocat túñt niijná, ï beje naáh. ¹⁶ Obohjeéñtiñ, túi biícdiñ ñi ñumachah, chah ã túina caá. Yeéb Jesúsdiñ jéihñitboó ñi weha mána Jesúsdiñ ï jepahat píñah, Dios queéñdiñ ã túi ùbat píñah niijná, ñi jéih teo wáacmi nacaá. “Ï jepahbiñna caá. Ï jepahcan niít”, jwã niij jéihcan caá.

¹⁷ Nin pah niñat Jesúsíhwãdiñ wãpi naóñna caá: Jesucristodiñ jepahñit, ded pah ñi ñumatjidiñ biíc yoobó ñi ñumú. Páant ñi ñumat píñahdiñ jwã Maáh jéihñit, yeebdíñ ãñt jwejep taga. ¹⁸ Det Jesúsdiñ jepahñit bóodñitji ñumna, ï náñni dahwaca bojo naáh. Obohjeéñtiñ, bóodcannit ñumna, ï bóodat túñtca bojo naáh. ¹⁹ Bóodñitdiñ, bóodcannitdiñbut Dios biíc yoobó ã enna caá. ã watatdiñ jwiíñdiñ jepahat caá náahap. Pániñ jepahñitdiñjeh ã wëi enna caá. ²⁰ Dios yeebdíñ ãñih píñahdiñ ã ñío láa ded pah ñi ñumatji pah ñi túñt ñumcá bojoó. ²¹ Teo wãññit ñi ñumachah, ã túina caá. Páant ñi ñumatdiñ ñi náñni dahwaca bojoó. Obohjeéñtiñ, ñi maáta yeebdíñ watíñna, ï wata naáh. ã túimi nacaá. ²² Dios ã túi ùbachah, bitadiñ teo wãññitboó jwã maáññ ñumna, watñit dée pah ï ñumna caá. Bitadiñ teo wãñcannitboó Jesucristodiñ teo wãññit caá. ²³ Jesúsíhwã ñi ñumat píñah niijná, yeéb ñi yéejat jíib ãñt wun wãñup tají. Pániñ ãñihwã ñumna, ã weñat píñahdiñjeh yeebdíñ chãjat caá náahap. Yeebdíñ

bita Jesúsdiĥ ĩ cádahat túutuchah, queétdiĥ ñi joyáh bojoó. ²⁴ Pániĥna, wã úudwã panihnitá, Jesúsdiĥ jwíih jepahnit, yeéb niĥat ded pah ñi jumati biíc yoobó ñi jumúú. Páant ñi jumuchah, Dios yeebdíĥ wēi ennit, ā teo wáacipna caá.

²⁵ Bĥĥ, áa wihcannitdiĥ ñi úúbh joyátdiĥ wã jepahbipna caá. Ded pah queét ĩ chājat pínahdiĥ Dios ā wutcan caá. Obohjeéhtih, weém wã jenah joyátdihjeh wã naóhbipna caá. Dios weemdíĥ ā jġah en teo wáacachah, wã jenah joyátdiĥ ñi túi joyóchah, ā túimi nacaá. ²⁶ Nin pah wã jenah joiná caá: Bĥĥ yeó jáapna Jesúsíhwã tūbit yeejép ĩ yapna caá. Ñi áa jumuchah, chah ā buobipna caá. Pániĥna, áa wihcannit jumna, áa wihcanjeh jumati caá náahap. ²⁷ Obohjeéhtih, áa jumnitboó ñi áadiĥ yohcat caá náahap. Áa wihcannitboó ñi áa pínahdiĥ bidcat caá náahap. ²⁸ Páant wã niijíchah yĥhna, ñi áa pínahdiĥ bíd jūinít, téihya chéonit, ā túina caá. Obohjeéhtih, nin yeó jáapnadiĥ áa jumnitboodíĥ chah ā buobipna caá. Ñi áa wihcaĥ, nump yeebdíĥ ā buobipna caá.

²⁹ Páant niijnít, wã úudwã panihnitá, nin pah wã naóhna caá: Jesús ā jwúub dei jūúwát pínah bahni-jeh ā judhna caá. Pániĥna, ded pah ā weñat pínahdiĥ búdí jenah joyát caá náahap. Ñi weĥa mána yaádh ĩ weñat pínahdiĥ ñi jenah joyát chah, Jesús ā weñat pínahdiĥ jenah joyát caá náahap. ³⁰ Jwí jġahat, jwí weñat, dede pínah nihcan caá. Bí déedih júb chājna yĥhna, bíbohcanit pah ñi jumúú. ³¹ Pániĥna, Jesús ā wutatdiĥ túi chājat túut niijná, nin baácboó jumnidih búdí wēi jenah joicát caá náahap. Ded pah Jesús ā wutatboodíĥ jwiítdiĥ túi jenah joyát caá

náahap.

³² Bíí déedih jenah joicánjeh, Dios ã weñat pínahdih ñi túi jenah joyát dih yeebdíh búdí wã náah yacna caá. Áa wihcanniboó jwĩ Maáh ã weñat pínahdihjeh ded pah ã chājat pínahdih ã túi jenah joiná caá. ³³ Obohjeéhtih, áa jumniboó ãjeéh bóli mi túi weñat pínah niijná, bíí déedihjeh ãpĩ jenah joiná caá. ³⁴ Pánihna, Dioíh pínahdih ã jenah joicán caá. Yaáhdihbut bíic yoobó ã jumna caá. Caánt mi áa wihcan, jwĩ Maáh ã weñat pínahdihjeh ded pah mi chājat pínahdih mi túi jenah joiná caá. Dioíh wili mi jumna caá. Obohjeéhtih, áa jumna, newé ã weñat pínahdihjeh mi jenah joiná caá.

³⁵ Pánih naóhna, túi wēinit ñi jumat pínahdih yeebdíh wã náah yacna caá. Diosdihjeh túi oinit, ã weñat pínahdih jenah joinít, bíí déedih jenah joicánjeh, ñi túi jumat pínahdih caá wã náah yacap.

³⁶ Вѣ, bíih naáwát yeéb japatadih jwuh wã naóhbiipna caá. Ñi náahnit yaádh ĩ behechah enna, “Caántdih ubnit, jwiít chénat pah jwĩ túi jumbiipna caá”, niij jenah joinít, ñi ubwú. Páant ñi ubuchah, yéejat nihcan niít. ³⁷ Obohjeéhtih, bíihboó “Áa wihcanni wã jumuchah, chah ã túibiipna caá”, ã niij jenah joí dée caá. Páant caanjéh niij jenah joiná, bita caandíh ĩ wutcah, ã jenah joyát pah chājna, caanbút ã túi chājna caá. ³⁸ Pánihna, ded ã áa pínahdih ubnit, ã túi chājna caá. Obohjeéhtih, ded caántdih ubcan, chah ã túi chājna caá.

³⁹ Dedh áa jumnih, mi áa ã wuncah, caandíh cádahcat caá náahap. Obohjeéhtih, mijeéh bóo ã wunuchah, chéwat déedih ã watachah, ded bíih áa wihcannidih náahna, mi jwúub áa jumuchah,

ã táina caá. Obohjeéhtih, Jesúhdihjeh mi ñíwi naáh. ⁴⁰ Weémboó nin pah wã niíj jengah joiná caá: “Mi jwúub áa jumcan, chah mi wëibipna caá. Túini Espíritu caá weemdíh páant ã niíj jengah joyát tútup be”, wã niíj jengah joiná caá.

8

Pãpnidih ï wũhni déep

¹ Bũũ, biíh ñi wũbh joí daacátjidih wã jepahbipna caá. Nin pah ñit niíj wũbh joyóp tají: “¿Pãpnidih ï wũhni déepdih jwiít Jesúhwã jwĩ jeéméchah, ã túimi niít? ‘Í pãpni cãacwã ï chãjnijeh caá. Dedé wëpat wihcan caá’, jwĩ niíj jéihna caá”, ñit niíj daacáp tají. Páant niijnít, “Jwiít chah jéihnit caá”, niíj jengah joinít pah ñit daacáp tají. Páant ñi niíj jengah joyát bitadih teo wáacat pínah nihcan caá. Bitadih oinit, queédih túinijeh naáwát caá náahap. ² Ded “Weémboó nihatdih túi jéih beedáni caá”, niíj jengah joiná yahna, yoobópdiã ã jéihcan caá. ³ Obohjeéhtih, ded Diosboodíh jéihni, caandíh oina, bitadih ã teo wáacbipna caá. Páant ã oyoachah, Dios caandíhbut jéihnit, “Caán wũih caá. Wã oini caá”, ã niijná caá.

⁴ “¿Pãpnidih ï wũhni déepdih jwĩ jeéméchah, ã túimi niít?” ñi niíj daacátjidih bũũ jwũh wã jepahbipna caá. “Pãpni báadhni nihcan caá. Dios biícjeh caá báadhni”, jwĩ niíj jéihna caá. ⁵ Bitaboó dawádih “Nin wëpni, jwiítidih teo wáacni caá”, ï niíj jengah joiná caá. Biquína widhdih, cúiwãdih, yeodíhbut páant ïpĩ niíj jengah joiná caá. Bitá jeé doóbhnadih, máa nahnadih, nuñúpwãdihbut páant ïpĩ niíj jengah

joiná caá. “Nin jwiít dih wēp teo wáacni caá”, ï ni-ijní, dawá ã jumna yuh caá. ⁶ Obohjeéhtih, jwiítboó nin pah jwĩ niíj jéihna caá: “Dios biícjeh, caánboó jwĩ íip caá”, jwĩ niíj jéihna caá. Caán nihatdih át chājap tajĩ. Jwiít cāacwādhbut át chājap tajĩ, āihwā jumna, caandíh jwĩ weñat pínah niijná. Jwĩ Maáh Jesucristo biícjeh caá. Caandíh Dios nihatdih chājat túutnit, jwiít dihbut át jumat túutap tajĩ, Diosdih jwĩ weñat pínah niijná.*

⁷ Obohjeéhtih, “Pāpni báadhcan caá”, jwĩ niíj jéihyechah yuhna, bitaboó, Jesúíhwā jumna yuhna, páant ï niíj jéih jwuhcan caá. Jesús dih ï jepahat pínah jātih, pāpnidih “Jwiít dih wēp teo wáacni caá”, niíj jenah joinít, caandíh wēina, ï wūhni déepdih ípĩ jeémép tajĩ. Pánihna, buubut Jesúíhwā jumna yuhna, pāpnidih wūhni déepdih jeémpnit, pāpnidih ï jenah joiná caá. Obohjeéhtih, yoobópdih ï túi beh joi jwuhcan caá. Páant niíj jenah joinít, “Páant wā jeéméchah, yéejat jíib weemdíh ã jumbipna caá”, ï niíj jenah joiná yuh caá. ⁸ Obohjeéhtih dedédih jwĩ jeéméchah, jwĩ jeémpcahbut, Diosboó biíc yoobó jwiít dih ã enna caá. ⁹ Caán déepdih jwĩ jeéméchah, ã túyuchah yuhna, bita Jesús dih jáap jéihnitdih jwíta yéjea tagaá. ¹⁰ Pāpnidih ï weñat pebhna waadnít, caandíh ï wūhni déepdih bitajeéh jwĩ jeéméchah ennit, “Caánboó Jesús dih túi jéihni páant ã jeéméchah, weemdíhbut ã túina nacaá”, ã niíj jenah joibípna caá. Obohjeéhtih, “Pāpni ã wēpna caá”, páantjeh niíj jenah joinít, jwúub jeémpna, ã túi chājcan caá. ¹¹ “Weém túi jéihni caá”, niíj jenah joinít, jwĩ jeéméchah, ã túina yuh caá. Obohjeéhtih, túi

* **8:6** Mal 2.10; Jn 1.3; Ro 11.36; Ef 4.6; Col 1.15-17

jéihnit jwĩ jumatdih jwĩ júutat jíib, bita Jesúshwã jwĩ úudwã panihnit, jáap jéihnitdih jwĩ yéejabipna caá. Jesús queétdih ã wun wãhuchah yuhna, buudnít ã jumbipna caá. ¹² Jwĩ úudwã panihnitdih páant yéejanit, Jesucristodih caá jwĩ yéejanap.* ¹³ Pánihna, weémboó wã úudwã panihnitdih oinit, queétdih yéejacat túut niijná, pãpnidih wëinit ã wãhni déepdih wã jeémpan niít.

9

Jesús ã naáwát túutnit ded pah ã jumat

¹ Jesús ã bohénitji biíc yoobó weembát Jesúsdih wã enep jĩ. Páant caandih wã enechah, weemdíhbat ã naáwát túutap jĩ. Pánihna, ded pah wã chãjíchah, Jesúsboó ã wutachah, ã túina caá. Weém caandih teo wãhni yeebdíh ãih doonádih wã naáwáchah joinít, ñi jepahap jĩ.* ² ãih doonádih jepahnit jumna, bitaboó “Pablo Jesús ã naáwát túutni nihcan caá”, ã niij jenah joyóchah yuhna, yeéboó weemdíh ã wahatjidih ñi jéihna caá. Wã bohénachah joinít, jepahna, “Jesús ã wëpatjĩh jwiítidih ã bohénap jĩ”, ñi niij jéihna caá.

³ Bitaboó nin pah ãpĩ niijná caá: “Caánboó Jesús ã naáwát túutni nihcan caá”, ã niijíchah yuhna, queétdih bohéna, ñi túut nuumátjidih wãpĩ naóhna caá. ⁴ Cãacwãdih jwĩ bohénachah, jeémátidih babhbatdihbat queétoó jwiítidih wãhat caá náahap. ⁵ Jesús úudwã, Pedrobat, nihat bita Jesús ã naáwát túutnitbat ã weha mána yaádh biícidih ã bohé jibichah, ded pah ã náahatdih ãpĩ wãhna caá.

* **8:12** Mt 25.45 * **9:1** Hch 9.3-6; 1Co 15.8; Gá 1.11-16

Jwiítbut áa jumna nihna, queét yaáhdihbut jwĩ numah jibichah, jwĩ náahatdih yeebdíh wūhat āta náahcan tagaá. ⁶ Nihat bohé jibnitdih ĩ bohénitboó dedé ĩ náahatdih ĩpĩ wūhna caá. Pánihna, weém Bernabéjĩh jwĩ bohénachah, biíh tewatdih jwĩ teocat pínah niijná, jwiít chénat pahdih jwĩ náahatdih yeebdíh wūhat caá náahap. ⁷ Soldadowā queétjeh ĩ náahatdih ĩpĩ jīb chājcan caá. ĩ maátaboó queédih ĩpĩ wūhna caá. Iguíh momnitboó ĩih iguíh quehechah, ĩpĩ jeémpna caá. Nihat ovejawādh en daonítboó ĩih ovejawādh ĩpĩ mao jeémpna caá. ⁸⁻⁹ Páant wā niiját jwiít cāacwā jwĩ jenah joyátjeh nihcan caá. Moisésji nin pah āt niúj daacáp tajĩ: “Momo jiwĩ trigo tíbnadh ĩ caóh chuñuchah, āih jacdh ĩi chéoca bojoó, tíbnadh jeémíhna, ĩ jeémát pínah niijná”, āt niúj daacáp tajĩ.* ¿Páant ĩ niúj daacát tūutna, momo jiwidihjeh niút Dios āt jenah joijíp?*

¹⁰ Nihcan caá. Jwiít bohé jibnitboodíh āt jenah joyóp tajĩ, cāacwādh jwĩ bohénachah, jwiítidih ĩ tūi en dawát pínah niijná. Wápchidih teonit, jeémátidih ĩpĩ bidna caá. ¹¹ Jwiítbut momnit dée, yeebdíh Jesúih doonádh jwĩ tūi bohénap jĩ. Páant jwĩ chājachah, jwĩ náahatdih yeebdíh wūhat āt náahap ta yūh jĩ.* ¹² Pánihna, bita bohénitdih ĩipĩ wūhat pah, jwiítidihbut wūhat caá náahap.

Obohjeéhtih, páant wūhat yeebdíh ĩ náahachah yūhna, ĩi wūhcah ennit, jwiítboó jwĩ úbh tac buugácap jĩ. Pánih úbhcanjeh, búdí jwĩpĩ tewep jĩ. Jwĩ úbháchah, nin pah ĩita niúj jenah joi tágaá: “Pablowā bií déedih náahnitjeh, ĩ bohéna caá”, niúj

* **9:8-9** Dt 25.4 * **9:8-9** 1Ti 5.18 * **9:11** Ro 15.27

jenah joinít, jwĩ bohénachah, ñita joíhcan tagaá. Pánihna, yeebdíh bohéna, ded pah jwĩ náahatdih jwĩpĩ uúbhcap jĩ. ¹³ Obohjeéhtih, nindih ñi tái náhninaá: Dioíh munná jubínit, jwiít judíowā sacerdotewādih nuñápawādih jwĩpĩ wāhna caá, Diosdih ĩ cáo wūhat pínah niijná. Dios queét sacerdotewādih, bita caánboó teonitdihbat ĩ cáo jadhni déepdih át jeémát túutup tajĩ.* ¹⁴ Pánihna, biíc yoobó jwĩ Maáh Jesucristo jwiít áih doonádih naóhntdih jwĩ bohénitdih át en dawát túutup tajĩ.* ¹⁵ Páant ā wutuchah yuhna, weémboó yeebdíh wāpĩ uúbhcap jĩ. Būubut páant niij daácna yuhna, “Weemdíh ñi teo wáacá”, niijná wā chājcan caá. Weém nuugúp wūnna yuhna, wāta uúbhcan tagaá. Wā uúbúchah joinít, ñi wūhachah, “Weém jíib wihcanni Jesúih túini doonádih wāpĩ bohéna caá”, wāta jéih niijcán tagaá.

¹⁶ “Jesúih túini doonádih wā bohéat jíib, Dios ā enechah, weém chah túini caá”, wāpĩ niij jenah joicán caá. Obohjeéhtih, Dios weemdíh ā bohéat tútatdih chājcan, tubit wāta jĩgah tagaá.* ¹⁷ Wā náahat pahjeh áih doonádih wā bohéna, wā bohénitboó weemdíh ĩ jíib chājat pínahdih wāta bid tagaá. Obohjeéhtih, wā bohéihichah, wā bohéihcah yuhna, biíc yoobó áih doonádih weemdíh bohéat caá náahap. Ā wutuchah joinít, áih túini doonádih wāpĩ bohéna caá. Pánih jepahnit, weemdíh ā wūhni tewatjeh ā jamuchah, wā bohéat jíib wāpĩ bidcan caá. ¹⁸ Pánihna, jíib bidcanjeh bohéna, búdí wā wēina caá. Yeebdíh bohénitdih en dawát ā

* **9:13** Dt 18.1 * **9:14** Mt 10.10; Lc 10.7 * **9:16** Jer 20.9; Am 3.8

náahachah yuhna, weémboó wāpī ʉbhcān caá.

19 Páant wā bohénachah, cāacwā jíib wūhcan, weemdíh ī jéih wutcan caá. Bitā ī weñat pínahdih chājcan, Dios ded pah ā bohéat tútat pahjeh wāpī bohéna caá. Obohjeéhtih, pánih chājna yuhna, bita ded pah ī jumatdih ennit, biíc yoobó wāpī jumna caá, weemdíh wēi ennit, túini doonádih wā naáwáchah joinít, ī jepahat pínah niijná. 20 Pánih chājna, wā ʉudwā panihnitá, bita judíowādih Jesúih doonádih bohénit, ded pah ī chājat biíc yoobó weembát wāpī chājna caá, wā naáwáchah wēi joinít, Jesúsdih ī jepahat pínah niijná. “Nihat jwiít judíowā jwī ʉowā ī wutatdih wā jepahcah yuhna, Dios weemdíh ā túi enna caá”, wā niij jéihna yuhna, queétdih bohénit, jwī ʉowā ī wutatdih wāpī jepahna caá. 21 Bitā judíowā nihcannit Moisés ā wutatjidih jéihcannitdih bohéna, ded pah ī jumat pah biíc yoobó wāpī jumna caá, wā bohénachah wēi joinít, ī jepahat pínah niijná. Pánih jumna yuhna, Dios ā wutatdih wāpī yap yohcan caá. Ded pah Jesucristo weemdíh ā wutuchah, caandíhbut wāpī jepahna caá. 22 Jáap jéihnitboodíh bohéna, “Weém Jesúsdih chah jéihni caá”, wāpī niijcán caá. Queétboó túi beh joi jwáhcan, “Nin pah chājnit, wāta yéej chāj tagaá”, niij jenah joinít, ī chājcatdih weembát wāpī chājcan caá, queétdih teo wáacat tút niijná. Pánihna, nihat ī jumat biíc yoobó wāpī jumna caá, wā bohéatdih ī túi jepahachah, Dios queétdih ā túi ʉbat pínah niijná. 23 Jesúih túini doonádih nihat cāacwā ī joyát pínah niijná, páant wāpī chājna caá. Pánih chājna, queét ī jepahachah, Dios pebhboó jumna, jwiít biícđih jwī túi wēibipna

caá.

²⁴ Dios pebhboó juibínit, chah túini ã wūhat pínahdih bídnit, nin baácboó jum jwuhna, ded pah ã wutadnih ñi túi jepahaá. Nin pah ã jumna caá: Căacwă ñáonit, nihat ĩ ñáwachah yuhna, chah wēpép ñáonidihjeh wēinit, túinidih ĩpĭ wūhna caá. Pánihna, chah wēpép ñáoni dée jwiítbut Dios ã wutadnih túi chājnit, ã pebhboó jwĭ juibínachah, jwiítnih wēinit, túinidih ã wūhbipna caá. Pánih wēpép ñáoni dée, Dios ã weñat pínahdih túi chājat caá náahap. ²⁵ Nin pahbut ã jumna caá: Ñáonitboó ĩih bácahdih ĩpĭ wēpana caá. Pánih wēpana, ĩih bácahdih yéjaat pínahdih ĩpĭ chājcan caá. Căacwă queétdih wēinit, núojĭh péeb waoni júđudih ĩ wūhatnih ĩpĭ bidna caá. Obohjeéhtih, pánih wūhni júđu waícanjeh āpĭ wunah bejna caá. Pánihat dée jwiítboó jwĭih caolihdih yéjaĭhcan, Diosdih wūbhnit, ã naáwátidihbut jwĭpĭ jenah joiná caá. Pánih chājnit, ã pebhboó jwĭ juibínachah, túinidih jwiítnih ã wūhbipna caá. Caán ã wūhni pínahboó ã buđcán niit. ²⁶ Weémboó yoobópdihjeh ñáoni dée, Dios ã weñat pínahdihjeh chājat túut niijná, caandih wāpĭ túi jenah joiná caá. Míc mao tíohnit yoobópdih ĩ mao chūúát pah, weembút Jesús ã wutadnih túi chājat túut niijná, Diosdih wā túi jenah joiná caá. ²⁷ Ñáonit, míc mao tíohnit ĩih bácahdih yéjacet túut niijná, ĩ náahatnihjeh ĩpĭ chājcan caá. Páant ĩ chājat pah, weembút wĭih caolihdih yéjacet túut niijná, wā náahatnih chājcan, Dios ã weñat pínahdihjeh wāpĭ chājna caá. Pánih chājnit, Dios pebhboó wā juibínachah, “Bitadih ma bohénachah yuhna, dedé jíib wūhat pínah meemdih ã wihcan

caá”, weemdih ã niijcán niít.

10

Egipto baácmant jũóhnit ded pah ï yapatji

¹⁻² Dios pebhboó juibínit, jwiít dih wëinit, táinidih ã wãhat pínahdih jwiít nihat jwĩ bidna caá. Pánih bidnit, jwiít judíowã jwĩ nɯowã Egipto baácmant jũóhna, ded pah ï yapatjidih jwiít dih táí náhníat caá náahap. Queét nihat Moisésjeéh ï bejehah, Diosboó queétdih wapna, mah põh panihnijĩh át waáwáp wut jĩ.* Mɯj Mac Dɯnidih jõpanit, queét nihat Moisésjeéh Dios át cháuh bejat túutɯp wut jĩ.* Pánih jamna, Moisésdih ít táí péenap wut jĩ.
³Tútchi wihcapboó jamnit, Dios ã wãhni jeémátdih nihat ïpĩ jeémép wut jĩ.* ⁴Mɯj wihcah, mah ã bac jũúwát pínah niijná, Dios Moisésdih búdí jee dáhdih át mawat túutɯp wut jĩ. Páant ã chãjachah, ã wãhni mahdih queét nihat ít babhbap wut jĩ. Jee dáhmant ï babhni mah ã bac jũúwát dée, Je-sucristobut Túini Espíritudih át wũhɯp wut jĩ. Ï jéih encah yuhna, Jesús ïjeéh ã jib bejehah, ã wãhni Túini Espiritu queétdih át teo wáacap wut jĩ.*
⁵Obohjeéhtih, queétdih Dios búdí ã teo wáacachah yuhna, biquínajeh caandih ít jepahap wut jĩ. Bitá dawá caandih jepahcannitdih wëi encan, Dios queétdih át peéh chãjap wut jĩ. Pánihna, nihat Egipto baácmant jũóhnit, tátchi wihcapboó jib be-jna, páantjeh ít wɯn beedép wut jĩ.*

* **10:1-2** Ex 13.21-22 * **10:1-2** Ex 14.22-29 * **10:3** Ex 16.35

* **10:4** Ex 17.6; Nm 20.11 * **10:5** Nm 14.29-30

6 Páant queét nihat ã yapatdih náhnina, biíc yoobó yeejép ã chãjat pah jwĩ chãjca boj jĩh.* 7 Dios ã daacát túutni tólih, Éxodo ã niijnídih, nin pah át niij daacát túutur tajĩ: “Queét cãacwã ã pãpnidih wẽinit, biíc dih wẽi jeemp babh máihna ãt chãjap wut jĩ”, át niijíp tajĩ.* Páant ã yéj chãjat pah, jwiít dih chãjcat caá náahap. 8 Biíh láa biquína yaadh metnit, íí náah ãt chãjap wut jĩ. Páant ã íí náah chãjat peéh biíc yeó jáapdihjeh veintitrés mil queétdih Dios át mawap wut jĩ.* Páant ã chãjat pah, jwiít dih chãjcat caá náahap. 9 Biíh láa, biquína nin pah Moisésdih ãt niij jũihñur wut jĩ: “¿Dépanih tibeé jwiít dih Egipto baácmant ma ub jũóh? Nin tátchi wihcapboó jwĩ yabh jibna caá. Dios jwiít dih ã túi en daocán caá”, ãt niijíp wut jĩ. Páant niijnít, Diosdih tac buugána, caandíh ãt íijanap wut jĩ. Páant ã yéjcat peéh, Dios maiwãdih át wahap wut jĩ, queétdih ã chãác mawat pínah niijná.* Páant ã yapatdih jenah joinít, ã chãjat pah jwiít dih chãjcat caá náahap. 10 Biíh láa, biquína nin pah ãt múic niijíp wut jĩ: “¿Dépanih tigaá Dios Moiséswãdihjeh jwĩ maáta át chãj? Jwiít nihat biíc yoobó túinit jwĩ jumna caá”, múic niijnít, Diosdih ãt jũihñur wut jĩ. Páant ã jũihñat peéh mawat pínah niijná, Dios ãih ángeldih át wahap wut jĩ.* Páant ã chãjat pah, jwiít dih chãjcat caá náahap.

11 Páant queét ã yapatji jwiít péeni yeó jáapna jumnitdih ã jéihyana caá. ã yapatjidih Moisés ã daacátjidih ennit, túi jenah joinít, biíc yoobó jwiít dih chãjcat caá náahap. 12 “Weémboó Jesús dih

* 10:6 Nm 11.4 * 10:7 Ex 32.6 * 10:8 Nm 25.1-18 * 10:9 Nm 21.5-6 * 10:10 Nm 16.41-49

wã chah túi jenah joiná caá. Dedé yéej chãjat jenah joyát weemdih ã jũúwáchah yuhna, wã túi jéih yap yohna caá”, niij jenah joiná, ñi túi chãja chaáh. Páant niij jenah joiná yuhna, jon jãtíh moón ã chãjat pah, ñi jwúub yéej chãjmi nacaá. ¹³ Jwiít nihat biquí láana yeejép chãjat jwĩ jenah joiná caá. Páant jwĩ yéej chãjíchah yuhna, jwĩ yéej chãjcat pínah niijná, Dios jwiít dih ãpĩ teo wáacna caá. Pánih teo wáacna, namá déedih jwiít dih ãpĩ júutna caá, jwĩ yap yohat pínah niijná. Pánihna, ded pah jwĩ buujácat dih jéihnit, chah yeejépdih jãhnit, jwiít dih ãpĩ teo wáacna caá.

Pãpnidih wëicat

¹⁴ Wã chéenwã, nindih ñi túi joyoó: Bitá “Jwíih dios, jwiít dih teo wáacni caá”, ã niij pãpnidih ã weñepboó bejcanjeh, queét ã chãjat biíc yoobó yeebbút ñi chãjca bojoó. ¹⁵ Yeéb túi jéihnit jumna, ded pah ñi chãjat pínah dih jéihyat túut niijná, nin wã naáwát dih yeebjéh ñi túi jenah joyoó: ¹⁶ Míic wáac jwinít, Jesúih meép panihni iguúh macdih babhnit, ãih bácah panihni pandihbut biíc dih jwĩ jeémát dih bainí yeebdíh wã naóhbipna caá. Pánih babh, jeémpna, ã wun wãhat dih jenah joinít, “Túina caá”, jwĩpĩ niijná caá. “Jwiít dih wun wãhna, jwiít ãjeéh túi biíc dih jwĩ jumachah, ã wëpat jwiít dih but ã wãhna caá”, jwĩ niij jéihna caá.* ¹⁷ “Jwĩ jeémpni pan biíc dahjeh ã jummat pah, jwiít nihat biíc dih biíc bácah dée jwĩ jumna caá”, niij jéihnit, caán pan dah dih biíc dih jwĩpĩ jeémpna caá.

* **10:16** Mt 26.26-28; Mr 14.22-24; Lc 22.19-20

18 Jwiít judíowã ded pah jwĩ chãjatdih ñi jengah joyoó: Dioíh munná bejnit, nuñépdih mao cáo wãhnit, Diosdih jwĩpĩ wẽina caá. Caandíh jwĩ wãhat túttimah, caán déepdih jeémpna, Diosjĩh biícwã jwĩ jumna caá. Bitabut pãpnidih ñi wãhnijidih jeémpna, queébtut caanjĩh biícwã ñi jumna caá.*

19 Páant niijnít, “Jwĩih dios caá”, niij pãpni, caandíh ñi wãhnibut “Dedé wẽpat ã jumna caá”, wã niijcán caá. 20 Obohjeéhtih, dedé wẽpat ã wihcah yuhna, bita caandíh jeémátidih wãhna, Diosdih jengah joicánjeh, nemépwãboodíhjih jengah joinít, ñi wãhna caá. Pánih wãh péanit, jwũub jeémpna, nemépwã biícidih ñi jumna caá. Yeébbodíh nemépwã biícidih ñi jummatdih wã náah yaccan caá.*

21 Nemépwã biícidih jumna, Dios biícidih ñi jéih jumcan caá. Dios biícidih túi jummat túut niijná, nemépwã biícidih jumcat caá náahap. Pánihna, nemépwãdih ñi wãhni jeémátidih ñi jeémpca bojoó. Caandíh wãhni babhbatdihbut ñi babhca bojoó. Jesucristo ã wun wãhatdih jengah joinít, caán biícidih jummat túut niijná, ãih meép panihni iguúh macdih babhna, ãih bácah panihni pan dahdih jeémát caá náahap.*

22 Pãpnidih wãhniiji jeémátidih, Jesús ã wunatdih jengah joiní jeémátidihbut jeémpna, jwĩ Maáhdih ñi íjana caá. ¿Yeébbó Diosdih chah wẽpnit niít ñi jumap? ¿Ñi yéejat ã peéh chãjatdih ñi jéih jweimí naniít? Nihcan caá. Pánihna, ã íijatdih úmmit, nemépwãdih ñi wãhnijidih ñi jeémp, babhca bojoó.*

Bitadih oinit, teo wáacat

* **10:18** Lv 7.6 * **10:20** Dt 32.17 * **10:21** 2Co 6.15-16 * **10:22** Ex 20.5; Dt 32.21

23 Biquína yeéb nin pah ñi niíj jenah joiná caá: “Jesucristodih jepahni jumna, ‘Ma chãjca bojoó’, niiját weemdih ã wihcan caá. Weemdih yéej chãjatjeh ã náahcan caá”, ñi niíj jenah joiná caá. Obohjeéhtih, biíh jwĩ chãjachah, túini jumna yuhna, jwiít dihjeh, bitadihbüt ã teo wáaccan caá.*

24 Pánihna, jwĩ weñat pínahdihjeh chãjcan, bitadih jwĩ teo wáacat pínahdih chãjat caá náahap.

25 Déepdih jíib chãjatboó jíib chãjadih bejna, “¿Pãpnidih ã wũhni niít? ¿Wã jeéméchah, ã túimi niít?” niíj wũbh joicánjeh, jíib chãjnit, ñi jeémé. 26 Jwĩ íip Dios nihadidih ã chãjni, nihát ãih caá. Dedé jwĩ jeémát pínahdihbüt chãjnit, jwiít dih ã wũhna caá. Pánihna, ã wũhndidih jwĩ jeéméchah, ã túina caá.*

27 Jesúsdi h jéihcanni yeebdih ã numah jeéméchah, bejnit, dedé ã wũhuchah, “¿Nin pãpnidih ã wũhni niít?” niíj wũbh joicánjeh, ñi jeémé. 28 Obohjeéhtih, Jesúsdi h jáap jéihnibüt jumna, “Nin déep pãpnidih ã wũhni caá”, yeebdih ã niijíchah joinít, caandih ñi jeémpca bojoó. 29 “Wã jeéméchah, ã túina caá”, niíj jéihna yuhna, jeémpnit, jwĩ Maáhdih jáap jéihniboodih yeéb ñita yéaja tagaá. Obohjeéhtih,

“Ñi jeémpca bojoó”, wã niijíchah joinít, nin pah weemdih ñita niíj wũbh joi tagaá. “Caandih wã jeéméchah ã túyatdih jéihna yuhna, ¿Dépanihna jáap jéihni ã jenah joyát pah weemdih chãjat náah?*

30 Dedédih jeémpnit, ‘Ma wũhat túina caá, Paá’, wãpĩ niijná caá. Páant wã niijíchah yuhna, ¿Dépanihna, ‘Caandih jeémpnit, ma yéej chãjna caá’, weemdih ma niíj?” ñita niij tagaá.

* 10:23 1Co 6.12

* 10:26 Sal 24.1; 50.12; 89.11

* 10:29 1Co

31 Páant níj naóhna, nin pah niijná caá wã chãjap: Jwiít Jesúhwãdih túi chãjat caá náahap, bita jwiít dih ennit, queébtat Diosdih ï weñat pínah niijná. Pánihna, jeémp, babh, dedédih chãjna, bita Diosdih ï wēi naáwát pínah niijná, túi chãjat caá náahap. 32 Judíowã, judíowã nihcannit, Jesúhwãdihbat yeejép ñi chãj júutca bojoó. 33 Weémboó dedé wã chãjihna, nihat cãacwã ï túi jumatdih jenah joinít, wãpĩ chãjna caá. Pánihna, Jesús dih ï jepahachah, Dios queédih ã túi ubat pínahdih búdí náah yacna, wã túi jumat pínahdih jenah joicánjeh, bita ï túi jumat pínahdih wãpĩ jenah joiná caá.

11

1 Weém Jesucristo ded pah ã chãjatjidih jenah joinít, biíc yoobó wãpĩ chãjna caá. Páant wã chãjat pah, yeebbát ded pah wã chãjatdih ennit, biíc yoobó ñi chãjaá.*

Míic wáacnit, ded pah ï chãjat pínah

2 Ded pah wã chãjatjidih náhninit, yeéb biíc yoobó ñi túi chãjna caá. Jesúh doonádih jwĩ bohénachah joinít, páantjeh ñi túi jepahna caá. Páant ñi chãjachah, yeebdíh wã wēina caá.* 3 Bũũ biíhdih wã naóhbipna caá, yeéb Jesúhwã míic wáacnit, ded pah ñi chãjatdih ñi túi jéihyat pínah niijná. Nindih ñi náhninaá: Jwĩ íip Dios Jesucristo ã maáh caá. Jesús neoná ï maáh caá. Neoná ï weha mána yaádh ï maáh caá. 4 Níih baácdih moón biíhdih jepahat júutna, níih waojih yégueh chóojih ñipĩ cáagna caá.

* 11:1 1Co 4.16; Fil 3.17 * 11:2 2Ts 2.15

Pánihna, Jesúih neonáboó ʘʘbhñit, Dios naáwát dih naóh yapanitbut jih cáagna, “Biíh caá wã maáh. Jesús nihcan caá”, niiját júutat dée chãjñit, jwĩ Maáh Jesucristodih yeejép ã chãjna caá. ⁵ Yaádhboó ʘʘbhna, Dios naáwát dih naóh yapanit, jih cáagcan, “Wãjeéh bóodih wã jepahcan niít”, niiját júutat dée chãjñit, ã weha mánadih yeejép ã chãjna caá. Mi áa nihcanniyeéh yeejép chãjnih wili, nihat miíh waó yoóc boj yohnih dée mi jumna caá. ⁶ Yaádhboó ãih waojĩh yégueh chóojĩh cáaguíhcan, waó yoóc boj beedánih ã jumna naáh. Obohjeéhtih, boj beedáat dih tíicñit, ã jih cáaga naáh. ⁷ Diosdih ʘʘbhna, neonáboó Dios ã nihat panihni jumna, ãih wao dájhjih cáagcat caá náahap. Páant ã cáagcan, “Diosjeh caá wã maáh. Caánboó chah túini caá”, ã niiját júutna caá. Yaádhboó cáagnit, “Wãjeéh bóo túini caá. Caandih wã wēi jepahna caá”, ã niiját júutna caá.* ⁸ Dios cáacwãdih jwíih chãjna, newédih át jwíih chãjap wut jĩ. Túttimah ãih páwájĩh yaddih át chãjap wut jĩ. ⁹ Newédih chãjñit, yaddih teo wáacni pínah nihcan wut jĩ. Obohjeéhtih, yadboodih newédih teo wáacnih pínah át chãjap wut jĩ. Páant tigaá neoná maáh panihñit ã jumna caá.* ¹⁰ Yaádh dih wao dáh jih cáagat caá náahap, ã weha mánadih ã jepahat júutat túut niijná, Dioíh ángelwã ã wēi enat pínah but niijná. ¹¹ Obohjeéhtih, neoná ã weha mána yaádh ã maáh ã jumuchah yuhna, Jesúihwã jumna, Dios queét chénat pahdih biíc yoobó ã enna caá. Pánihna, queétdih míic teo wáacat caá náahap. ¹² Dios newédih jwíih chãjna, ãih páwájĩh yaddih át chãjap wut jĩ. Bʘʘ yaádh caá neoná pínahdih ã

* **11:7** Gn 1.26-27 * **11:9** Gn 2.18-23

weh jumna caá. Obohjeéhtih, Dios caá nihatdih ã chãjap.

¹³ Míic wáacnit, ded pah ñi jummat pínahdih táii jéihyat túut niijná, yeebjéh ñi jenah joyoó. Níih títchinadih moón bitadih ï jepahat júutíhna, ïih waojéh yégueh chóojíh ïpí cáagna caá. Pánihna, yaádhboó Diosdih wúbhñit, ï weha mánadih ï jepahat júutna, queédih waojéh cáagat caá náahap. ¹⁴ Ñi cātíh newé waó yoóc maátñi ã d̥wúchah ennit, “¿Caánboó yad wili pah waó yoóc d̥oná, ã tíccan niit?” ñipí niij jenah joiná caá. ¹⁵ Obohjeéhtih, yadboó waó yoóc maátñi mi d̥wúchah ennit, “Míih waó yoóc maátñi d̥oná, mi táii jíghna caá”, ñipí niij jenah joiná caá. Pánihna, míih waó yoóc maátñi d̥onít, míjeéh bóodih jepahat júutna caá mi chãjap. ¹⁶ Páant wã naáwátñih ded bíihboó mácah ã naáwíhichah, nin pahjeh wã jepahna caá: Nihat jwiít yeebdíh bohénit wã naáwátñih bíic yoobó jwípí bohéna caá. Nihat nin baácnadih moón Dioíhwábut Diosdih wēinit, bíic yoobó ïpí chãjna caá.

Jesús ã wutni jeémátñih ï táii chãjcat

¹⁷ Jesús ã wutni jeémátñih buu bainí wã naóhbična caá. Míic wáacnit, Jesús ã wutni jeémátñih ded pah ñi jeémát doonáñih joinít, yeebdíh wã wēican caá. Jesús ã naáwátñih bíic yoobó chãjcan, caandíh ñi chah jenah joyát pínahdih míic teo wáaccanjeh, ñi míic yéejana caá. ¹⁸ Pánih míic wáacnit, Jesús ã wunatñih náhninit, bíicñih jeémát túut niijná yahna, ¿Dépanihna, bíicñih ñi jeémpcan? Biquína dawá bíi dée bíbohñit moh yéejñit bíicñih ï jeémíhcan caá. Bitaboó ï chéenwã

biíc yoobó jenah joinítjeh biícđih ĩ jeémpna caá. Obohjeéhtih, biquína bitajeéh ĩpĩ táı jeémpna caá. Pánih nihah biícđih jeémpcan, ded pah Jesús ā bohéatđih ñi chājcan caá. ¹⁹ Obohjeéhtih, pánih jumna, det Jesúsđih táı jepahnitđih, det Jesúsđih táı jepahcannitđihbət ñi jéihna caá. Páant ñi chājcan, ñita jéihcan tagaá. ²⁰⁻²¹ Ñi jeéméchah, bitadih pāicanjeh, ñi ıb jūóhni jeémátđih ĩpĩ jeémpna caá. Páant ñi jeéméchah, biquína moh yéejnitboó bainí jeémátđihjeh bíbohnit, táı jeémp chūúhcan, nuugúp ĩ wunna caá. Bitaboó búdí iguıh macđih ıb jūóhni, bitadih wūhcanjeh, ĩ babh máihna caá. Pánih chājna, “Jesús ā wutni jeémátđih jeémpna caá jwĩ chājap”, niijná yuhna, yoobópđih ñi niijcán caá. Ā wutni jeémát ā jumuchah, nihah ñi ıb jūóhni jeémátđih pāáhnit, biícđih ñita wēi jeémp tagaá. Pánih jeémpna, táı biícđih áih bácah pah ñita jum taga. ²² ĩÑi jenah joyoó buca! ¿Dépanihna tubit nuugúp tubuchah yuhna, ñiıh muúboojéh jum jwuhna, ñi jeémpcan? ¿Dépanihna bita Jesúsıhwā páant yeejép ñi chāj? ¿Dépanihna Jesúsıhwā moh yéejnitđih jıgah encanjeh ñi tíica? ¿Ded pah wā niijbí? ¿Páant ñi chājachah, yeebdıh wā wēimi naniıt? Nihcan caá. Wā wēican niıt.

Jesús ā wutni jeémát ded pah ā jummat

²³ Jesucristojeh nin pah weemđih ā jéihyanap jı, ā wun wūhatđih náhninit, ded pah pandih jeémp, iguıh macđih babhnit, jwĩ táı jeémát pınah niijná: Caandıh enıhcannit ĩ teoni pınah chei Jesús ā bohénitđih át numah jeémép wut jı. Pánih jeémpnit, jwĩ Maáh Jesús pan júđudih ıbnit, ²⁴ “**Nindih ma wūhat táına caá, Paá**”, niıj péanit, ā bohénitđih

ãt ði wũhup wut jĩ. Pãnih ði wũhnit, nin pah ãt niijĩp wut jĩ: “Nin pan wĩih bãcah panĩhni caá. Yeéb ñi yéejat jíib wã wun wũhbiþna caá. Pãnihna, nindih jeémpnit, wã wun wũhatdih ñi náhninaá”, ãt niijĩp wut jĩ. ²⁵ Pãnih jeémp péanit, Jesús pamapdihbut ub, wũbhnit, nin pah queétdih ãt niijĩp wut jĩ: “Nin iguĩh mac wĩih meép panihni caá. Wun wũhnit, jáap namá dée wã chãjþipna caá, Diosjeéh ñi túi jumat pínah niijná. Wã wun wũhatdih ñi túi jenah joyóchah, Dios ñi yéejatdih ã yohþipna caá, iiguĩþna bejnit déedih ã pebhboó ñi bejat pínah niijná. Pãnihna, iguĩh macdih babhnit, weemdih ñi náhninaá”, Jesús ã bohénitdih ãt niijĩp wut jĩ.* ²⁶ Pãnih pandih jeémp, iguĩh macdih babhbat jumat pah “Jesús weemdih ã wun wũhatdih wã túi jenah joiná caá”, niiját júutna caá jwĩ chãjap. Pãnihna, Jesús ã jwúub dei jũúwát pínah jãtih páantjeh jwiít ãihwãdih pandih jeémpnit, iguĩh macdih babhbat caá náahap.

Jesús ã wutni jeémãtdih ded pah ã jeémát pínah

²⁷ Jesucristo ã wun wũhatdih túi jenah joinít, bita Jesúihwãdih oinit, pandih jeémp, iguĩh macdih babhbat caá náahap. Ded jenah joicãnjeh jeémpnit, babhna, Jesúih bácahdih ãih meépdihbut “Dedé pínah nihcan caá”, niijnít, caandih búdí ã yéej chãjna caá. ²⁸ Ded ã jeémát pínah jãtih, ã yéej chãjatdih jenah joyát caá náahap. Pãnih jenah joinít, ã yéejatdih Diosdih naóh péanit, ã jeémé naáh. ²⁹ Jeémpnit, nin pah jenah joyát caá náahap: “Nin pan Jesúih bácah panihni, nin iguĩh mac ãih meép panihnidih enna,

* **11:25** Ex 24.6-8; Jer 31.31-34; Mt 26.27-28

wã yéejat jíib weemdíh ã wun wūhatdih wã náhnina caá”, niij jenah joí, jeémpnit, ã babhba naáh. Páant niij jenah joicán, dedé yéejatdih naóhcan, ã jeéméchah, Diosboó caandíh ã peéh chājbipna caá. ³⁰ Jesús ã wutni jeémát dih túi jenah joicánjeh ñi jeémát jíib, dawá tubáp chūúhñit, bitabat ït wunah bejep wut jī. ³¹ Obohjeéhtih, yeebjéh ded pah ñi yéejatdih jenah joinít naáwáchah, Diosboó yeebdíh āta peéh chājcan tagaá. ³² Pánihna, Dios buu yeebdíh peéh chājnit, bohéna caá ã chājap, túttimah iiguípna ñi bejcat pínah niijná.*

³³ Wã úudwã panihnitá, Jesús ã wutni jeémát dih jeémát túut niijná, míc wáacnit, nihatdih pāinit, bíicdih ñi túi jeémé. ³⁴ Nuugúp tubanitboó ïih muúboó jum jwuhna, ï jeémp wud jum naáh. Pánihna, túinijeh ñi jeémé, Dios yeebdíh ã peéh chājcat pínah niijná.

Ñi pebhna juibínit, bíih ñi úúbh joí daacátjidih wã jepahbipna caá.

12

Túini Espíritu ã jéihyaat

¹ Buu Túini Espíritu ã jéihyaatnadh ñi úúbh joyát dih wã jepahbipna caá, ñi túi jéihyat pínah niijná. ² Nindih ñi náhninaá: Yeéb Jesucristodih ñi jepahat pínah jātih, nemépwã ï maáh ñi nuowādh yeenit, ã jéih jepahcah yuhna, yeéb Corinto tútchidih moondíh pāpnitdih át úúbat túutap tajī. ³ Ded Túini Espíritu ã wēpatjīh naóhni, ded nemépwã ï wēpatjīh naóhñidihbut ñi jéihyat pínah niijná, nin pah wã niij daácna caá: “Túini Espíritu

* 11:32 Dt 8.5; He 12.5-11

ã wēpatjĩh naóhnit, ‘Jesucristo yeejép caá’, ã niijcán niít. Obohjeéhtih, nemépwāboó ã wēpatjĩh naóhnit, ‘Jesucristo Dios wāh, jwĩ Maáh caá’, ã jéih niijcán niít”, wā niijná caá.

⁴ Túini Espírituboó jwiít Jesúíhwādh teo wáacna, mácah jéihyatnadh ãpĩ wāhna caá. Obohjeéhtih, jéihyatna mácah ã jumuchah yuhna, caán Túini Espiritujeh páant ãpĩ teo wáacna caá. ⁵ Ded pah bitadh jwĩ teo wáaquíhichah, mácah ã jumuchah yuhna, jwĩ Maáh Jesússeh jwiít nihatdh ã teo wáacat túutna caá. ⁶ Bitadh mácah jwĩ teo wáacachah yuhna, Dios ã wēpatjĩhseh jwiít nihat jwĩ jéih teo wáacna caá. ⁷ Jwiít nihat Jesúíhwādh Túini Espiritu ã wēpatjĩh ãpĩ teo wáacna caá, jwiítbut bita áihwādh jwĩ teo wáacat pínah niijná. ⁸ Biquína ã wēpatjĩh, “Nin pah meemdh chājat caá náahap”, ã níj jéih naóh yapana caá. Bita ã wēpatjĩh ded pah yapatdh, ded pah yapat pínahdhbut ã túi jéih naóh yapana caá. ⁹ Bita ã wēpatjĩh, Diosdh chah jenah joinít, biíhdh ã jéih teo wáacna caá. Bitabut wunnitdh teo jáhanit, ã jéih booana caá. ¹⁰ Bitabut cāacwā ã jéih chājca naáhdh ã chājna caá. Bita Dios ã naáwáchah, ã jéih naóh yapana caá. Bita ded Túini Espiritu jumnidh, ded nemép jumnidhbut ã beh enna caá. Bitabut ã wēpatjĩh mácah wéheatjĩh ã jéih naóhna caá. Bita mácah wéheatjĩh ã naáwáchah joinít, ã jéih naóh yapana caá. ¹¹ Pánihna, nihat mácah ã jumuchah yuhna, Túini Espiritujeh ã weñat pínahdh chājnit, queét nihatdh ãpĩ teo wáacna caá.*

Jesúíhwā bíic bácah pah jwĩ jummat

* **12:11** Ro 12.6-8

12 Jwĩih bácah biícjeh ã jumuchah yuhna, téihyana jum, quíib dahna jum, jítchana jum, moli chónabut ã jumna caá. Obohjeéhtih, dawá ã jumuchah yuhna, nihat jwĩih bácahdih jumnijeh caá. Pánihat pah, jwiít Jesúíhwã dawá jumna yuhna, jwiít nihat biíc dih ãih bácah dée jwĩ jumna caá.* 13 Biquína judíowã, bita judíowã nihcannitbut jum, biquína teo wãhnit, bita teo wãhcannitbut jwĩ jumna caá. Obohjeéhtih, jwiít nihat mácah jwĩ jumuchah yuhna, jwiít dih teo wáacni Túini Espíritu biícjeh jumna, jwiít dih waadnít, jwiít nihat dih biíc bácah pah át chãjap taga.

14 Jwĩih bácahdih jumni biícjeh nihcan, dawá ã jumna caá. 15 Jwĩih jítcha wéheni nihna, “Caán téihya chah túini caá. Weémboó téihya nihcan, nin bácahdih jumni pínah nihcan caá”, ã niijíchah yuhna, bácahdih jumni páantjeh áta jum tagaá. 16 Jwĩih molítboó “Weém quíib dah nihcan, nin bácahdih jumni pínah nihcan caá”, ã niijíchah yuhna, bácahdih jumni páantjeh áta jum tagaá. 17 Obohjeéhtih, jwĩih bácahdih quíib dahjeh jumna, molít wihcah, ¿ded pah tigaá jwíta jéih jói? Molítjeh jumna, wuúic íit wihcah, ¿ded pah tigaá jwíta jéih jói? 18 Pánihna, nihat bácah jumnidih jwĩ náahna caá. Diosboó túi jéihni jwiít dih chãjni ded pah ã náahat dih nihat jwĩih bácahdih jumni pínah dih át chãjjip taga, jwĩ túi jummat pínah niijná. 19 Jwĩih bácahdih quíib dahjeh, jítchajeh, téihyajeh ã jumuchah, jwíta jéih jumcan tagaá. 20 Pánihna, dawá bácahdih jumni ã jumuchah yuhna, biíc bácahjeh ã jumna caá.

* 12:12 Ro 12.4-5; Ef 4.14-16

21 Jwĩih quíib dahboó “Weém nihat jéihni caá. Dedé weemdíh jũdhcan caá. Pánih jũmna, caán téihya ã teo wáacat pínahdih wã náahcan caá”, ã niijíchah yũhna, ã teo wáacat ã náahna caá. Jwĩih wao dáhboó “Dedé weemdíh jũdhcan caá. Pánih jũmna, caán jítchadih wã náahcan caá”, ã niijíchah yũhna, caandíh ã náahna caá. 22 “Wĩih bácahdih jũmni túi wēpcanni caá”, jwĩ níj jenah joiníboó chah ã náahna caá. 23 “Túí jígohcanni caá”, jwĩ níj jenah joiná, túini yéguehdih jwĩpĩ dæoná caá, túí jígohat túut niijná. Tíicnit, jwĩpĩ jãhna caá, bita ã encat pínah niijná. 24 “Bita ã enechah, dedé pínah nihcan caá”, jwĩ níj jenah joinídih jwĩpĩ jãhcan caá. “Wēpcanni caá. Túí jígohcanni caá. Tíic náah jũmni caá”, jwĩ níj jenah joinídih chah jwĩpĩ túi en daoná caá. Páant tigaá Dios ãt chãjap taga, 25 míic jũihñat dée wihcanjeh, nihat ã túí míic teo wáacat pínah niijná. 26 Pánihna, jwĩih quíib dah tũbna, nihat bácah ã tũbana caá. Quíib tũbat ã yayáchah, nihat jwĩih bácah ã túina caá.

27 Yeéb nihat Corinto tútchidih moón Jesúihwã ãih bácah dée ñi jũmna caá. Pánihna, jwĩih bácahdih jũmni nihat ã chãjat pínah mácah ã jumat pah, yeebbút Jesúih bácahdih jũmni dée, ñi chãjat pínahbut mácah ã jũmna caá. 28 Nihat Jesúihwã bíicdih jũmni, Túini Espíritu ã wēpatjĩh mácah jéihyatnadih Dios ãt wũhup taga. Dios ã jwĩih ñíonitboó Jesús ã naáwát túutnit ã jũmna caá. Túttimah, Dios naáwát dih naóh yapanit ã jũmna caá. Túttimah, ã naáwát dih bohénit ã jũmna caá. Túini Espíritu ã wēpatjĩh cãacwã ã jéih chãjca naáhdih biquína ã chãjna caá. Biquínaboó

wannitdih teo jáha wúbhñit, ã wēpatjīh ī jéih booana caá. Bitaboó, bitadih jīgah ennit, īpī teo wáacna caá. Bitaboó, cāacwādih túi waóhñit pínah ī jumna caá. Bitaboó, ã wēpatjīh, mácah wéheatjīh ī naóhna caá.* ²⁹ Yeéb nihat Jesús ã naáwát túatñit nihcan caá. Nihat Dios naáwátdih naóh yapanit pínah, nihat ã naáwátdih bohénit pínah, nihat wēp chājñit pínahbut nihcan caá. ³⁰ Nihat booanit pínah, nihat mácah wéheatdih naóhñit pínah, nihat mácah wéheatdih jwúb túut nuúm naóh yapanit pínahbut nihcan caá. ³¹ Jwiít biquínadih nihat jéihyatna ã wiñcan caá. Diosjeh caá ãih cāacwādih ã jéihyana caá. Chah túini jéihyat pínahdih bidna, jwiít nihatdih caandíh búdí wúbát caá náahap. Obohjeéhtih, bitadih jwī oyat pínah caá chah náahap. Pánih oina, Túini Espíritu ã wēpatjīh bitadih jwī túi teo wáacbipna caá. Jwī oican, Túini Espíritu jwiítidih ã teo wáacachah yuhna, bitadih jwī túi teo wáaccan niít.

13

Oyat

¹ Túini Espíritu ã wēpatjīh mácah wéheatjīh wéhenit, bita ī wéheat, ángelwā ī wéheatjīh wéhena yuhna, bitadih jwī oicah, dedé pínah nihcan caá. Yéej yáaatjeh caá. ² Túini Espíritu ã wēpatjīh Dios ã naáwáchah, jwī jéih naóh yapana yuhna, bitadih jwī oicah, dedé pínah nihcan caá. Ded pah Dios ã jummatdih, ã chājat pínahdihbut túi jéihna yuhna, bitadih jwī oicah, dedé pínah nihcan caá. Jwiít cāacwā jwī jéih chājca naáhdih Dios ã wēpatjīh jwī

* **12:28** Ef 4.11

jéih chãjat pínahdih táí jenah joiná yuhna, bitadiah jwĩ oicah, Dios ã enechah, dedé pínah nihcan caá.* ³ Nihat jwĩ bíbohatdih moh yéejnitdih jwĩ wãhuchah yuhna, Jesúih doonádih jwĩ naawát peéh bita jwiítidih ã cáwachah yuhna, bitadiah jwĩ oicah, Dios jwiítidih wēi encan, táinidih ã wãhcan niít.

⁴ Bitadiah oina, ded pah jwiítidih ã yéej chãjachah yuhna, yéej chãj jwũubacan, táinijeh jwĩ jumbipna caá. Bitadiah oina, jĩgah ennit, jwĩ teo wáacbipna caá. Queédih oina, ñih bií déedih en ñinahcan, ded pah ã táí yapachah, jwĩ íjcan niít. Pánih oina, queét jwiítidih ã wēi enat pínah niijná, ded pah jwĩ táí jumat, jwĩ táí yapat, jwĩ táí chãjatdihbut jwĩ naóhcan niít. “Weém nihat jéihni caá. Dedé jedhdad weemdih wihcan caá”, niijní pah jwĩ jumcan niít.

⁵ Bitadiah oina, queédih jwĩ tíccan niít. Pánih oina, chah táinidih jwiítjeh bíbohat táut niijná, jwĩ bidcan niít. Pánih oina, ded pah jwiítidih bainí yeejép ã chãjachah yuhna, waícanjeh jwĩ íjcan niít. Jwiítidih ã yéej chãjatjidih jwĩ quíib buudbípna caá. ⁶ Bitadiah oina, yeejép ã yapachah, yeejép ã chãjachahbut, jwĩ wēican niít. Obohjeéhtih, táini ã yapachah, yoobópdi ã chãjachahbut, jwĩ wēibipna caá. ⁷ Bitadiah oina, ã yéej chãjat doonádih bitadiah naóhcan, ã táí chãjihatdih jenah joinít, Dios queédih ã táut nuumát pínahdih jwĩ táí jenah joí cádahcan niít. Pánihna, ded pah jwĩ yapachah yuhna, jwĩ oi cádahcan niít.

⁸ “Ñi miic oyoó”, niij wutnit, Dios “Páant bóojeh tigaá. Yeebdih buu oyat náahcan caá”, ã ni-

* **13:2** Mt 17.20; 21.21; Mr 11.23

ijcán niít. Obohjeéhtih túttimah, Túini Espíritu ã wēpatjīh Dios naáwát dih naóh yapaat, mácah wéheatjīh naáwátbut, ded pah yapatdih, ded pah yapat pínahdih jéihyatbut dedé náahat ã wihcan niít. ⁹ Nin baácboó jum jwuhna, Túini Espíritu ã teo wáacachah yuhna, nihatdih túi jéih beedácan, nihat Dios naáwát dihbut túi yoobóp dih jwī jéih naóh yapacan caá. ¹⁰ Obohjeéhtih, Jesucristo, túini yoobát jumni, ã jwúb dei jūwúchah, nihatdih jwī jéih beedábipna caá.

¹¹ Nin pah jwī jumna caá: Weém wébít jumna, wébít ĩ jenah joyát, ĩ wéheat pahbut, weembút jenah joinít, wā wéhenap jī. Obohjeéhtih, buu behe jumna, wébít ĩ chājat pah wā chājcan caá. ¹² Nin pahbut ã jumna caá: Máa quenalih naajīh jwī túi míc encan caá. Pánihat dée Diosdih buu jwī jéih encan caá. Túttimah, jwiít chénaboó caandīh jwī míc jwāáh enbipna caá. Nin baácboó jum jwuhna, Diosdih jwī jéih beedácan caá. Obohjeéhtih, ã pebhboó juibína, jwiít dih buu ã jéih beedáat pah, jwiítbut caandīh jwī jéih beedábipna caá.*

¹³ Nin baácboó jum jwuhna, jwiít dih nin pah chājat caá náahap: Diosdih túi jenah joí cádahcan, jwiít dih ã túi chājat pínahdih páantjeh náhnina, caandīh, bitadihbut oi cádahcat caá náahap. Obohjeéhtih, oyat caá jwiít dih chah náahap.

14

Mácah wéheat, Dios naáwát dih naóh yapaat

¹ Míc oyat jwiít dih chah ã náahachah yuhna, Túini Espíritu ã jéihyaatnadihbut jwiít dih bidat caá

* 13:12 1Jn 3.2

náahap. Dios naáwátdih naóh yapaat wēpatdih chah bidat caá náahap, míc wáac jwinít, ñi jéih míc teo wáacat túut niijná. ² Mácah wéheatjĩh naóh nitboó cāacwādh wéhecan, Diosdihjeh ĩ wéhena caá. Túini Espíritu ā wēpatjĩh, Dios ā jéihyaatdih ĩ naáwáchah yuhna, nihat cāacwā ĩpĩ beh joicán caá. ³ Obohjeéhtih, Túini Espíritu ā wēpatjĩh Dios naáwátdih naóh yapanitboó cāacwāboodih ĩ wéhena caá. Diosdih chah ĩ túi jenah joyát pínah niijná; ded pah queétdih ā chājat túutatdih chah túi beh joinít, ĩ jepahat pínah niijná; ĩ ĩgahatdih, ĩ úumatdihbut ā yayát pínah niijná; páant ĩ niij naóh yapana caá. ⁴ Mácah wéhene āih caolidihjeh Túini Espíritu ā teo wáacna caá. Obohjeéhtih, Dios naáwátdih naóh yapaniboó Dioíhwā wáac jwinít dih ā teo wáacna caá.

⁵ Yeéb nihat mácah wéheatjĩh ñi wéheatdih náah yacna yuhna, Dios naáwátdih naóh yapaatdih chah wā náah yacna caá. Naóh yapaniboó Dioíhwādh chah ā teo wáacna caá. Obohjeéhtih, mácah wéheatjĩh naóhni, caandih jwáub túut numnijĩh biíc dih naóh nit, Dios naáwátdih naóh yapani biíc yoobó āihwādh ĩ teo wáacna caá. ⁶ Wā úudwā panihnitá, weém ñi pebhboó jwibínit, mácah wéheatjĩh wā naáwáchah, yeebdih āta teo wáaccan tagaá. Obohjeéhtih, ded pah Dios ā jéihyaatdih naóh yapanit, ded pah jwĩ chājat pínahdh naóh bohénit, yeebdih wā túi teo wáacap ĩ.

⁷ Nin pah ā jumna caá: Pelatdih, chíó nahdih yoobópdih jwĩ póojcah, joinítboó jwĩ póojatdih ĩ beh joicán niít. Bíitatdihbut yoobópdih jwĩ bíitcah, bitaboó jwĩjééh ĩ jéih eocan niít. ⁸ Póojat nahdih

yoobópdih jwĩ pójcah, joinítboó beh joicán, míc mawatdih teo wáacadih ï bejcan niít. ⁹ Pánihat dée, joinítíh wéheatjĩh yoobópdih ñi naóhcah, ï beh joicán niít. Ñi naáwáchah yuhna, queétdih dedé pínah nihcan niít. ¹⁰ Nin pahbút ã jumna caá: Nin baácboó dawá wéheatna ã jumna caá. Cãacwã ñih wéheatjĩhjih wéhena, ï míc beh joiná caá. ¹¹ Obohjeéhtih, weemdíh naóhniíh wéheatdih beh joicán, jwĩ jéih míc wéhecan caá. ¹² Pánihat pah, joinítíh wéheatjĩh naóhcan, ï beh joicáh, yeebbát queétdih ñi jéih teo wáaccan caá. Pánihna, Dioíhwādih teo wáacat pínah niijná, Túini Espíritu ã wāhni jéihyaatnadih búdí ñi bidíi.

¹³ Dioíhwādih teo wáacat túut niijná, mácah wéheatjĩh naóhniboodíh jwúb túut nuumát pínahdihbút úbát caá náahap. ¹⁴ Beh joicán yuhna, wíih caolihboó mácah wéheatjĩh wã túi úbhna caá. Páant wã úbúchah, wíih caolihdih ã teo wáacna caá. Wíih wéheatjĩh wã úbúchah, wíih jenah joyátboodíh ã teo wáacna caá. ¹⁵ Pánihna, mácah wéheatjĩh úbhnit, wíih wéheatjĩhbút wã úbhhipna caá. Mácah wéheatjĩh eonit, wíih wéheatjĩhbút wã eobipna caá. ¹⁶ Míc wáac junít, mácah wéheatjĩhjih Diosdih ñi weñechah, jéih jwuhcanni ñi cātíh jumna, ñi naáwátdih beh joicán, “Páant tigaá”, ã jéih niijcán niít. ¹⁷ “Túina caá, Maá”, yoobópdih ñi niijíchah yuhna, ñi niiját caán jáap juníiboodíh ã teo wáaccan niít. ¹⁸ Mácah wéheatjĩh yeéb ñi úbát chah weémboó pánih úbhna, wēinit, “Túina caá, Paá”, Diosdih wāpĩ niijná caá. ¹⁹ Obohjeéhtih, pánih úbhna yuhna, Jesúihwã jwĩ míc wáac junít, yeebdíh ã teo wáacat

pínah niijná, daocánni jacnabitjeh ñíih wéheatjĩh naóhna, chah wāta wēi tagaá. Diez mil jacnadih mácah wéheatjĩh wā naáwáchah yuhna, yeebdíh ā teo wáaccah, wāta wēican taga.

²⁰ Wā úudwā panihnitá, wébít ĩ jenah joyát pah ñi jenah joicá bojoó. Obohjeéhtih, yéej chājatdih jenah joicánnit ĩ jummat pah yeebbút biic yoobó ñi jummuá. Behnit ĩ jenah joyát pah mácah wéheatna ded pah ā jummat pínahdih túi jenah joinít yeebdíh jummat caá náahap. ²¹ Yeéboó nin pah ñipĩ niij jenah joiná caá: “Dios weemdíh túi wēinit, mácah wéheatdih āt jéihyanap be”, ñi niij jenah joiná yuh caá. Obohjeéhtih, Dios ā wēi enat júutat pínah nihcan caá. Dios naáwátdih naóh yapani Isaías nin pah ā niij daacátjidih ñi túi jenah joyoó: “Dios nin pah ā niijná caá: ‘Wíih judíowādih peéh chājat túut niijná, ĩ pebhna biíh baácđih moondíh wā wahbipna caá. Jātih wā naáwátdih naóh yapanit judíowā ĩih wéheatjĩhjih ĩ naáwáchah yuhna, ĩ jepahcap ĩ. Buu peéh chājat túutna, judíowā ĩ wéheatdih wéhecannit ĩ naáwáchah, páantjeh weemdíh ĩ jepahcan niít’, jwĩ Maáh ā niijná caá”, Isaías āt niij daacáp tajĩ.* ²² Pánihna, mácah wéheatna Dios áihwādih ā wēi enat júutat pínah nihcan caá. Ñi míic wáac jayúchah, caandíh jepahcannitboó mácah wéheatnadih joinít, Isaías ā daacátjidih náhninit, Diosdih ĩ jepahcatji jíb ā peéh chājat pínahdih ĩ jenah joibípna caá. Obohjeéhtih, yeéb Jesúíhwāboó Dios naáwátdih ñi naóh yapanachah joinít, yeebdíh teo wáacnit, jepahcan-nitboodíh ā teo wáaccan niít. ²³ Míic wáac jwinít,

* **14:21** Is 28.11-12

yeéb dawá mácah wéheatjĩh ñi naáwáchah, bita jéihcannit, Jesúsdiŋ jepahcannitboó waád jwinít, “Queét mácah wéheatjĩh naóhñit jenah joicánnitjeh caá”, ĩ niíj jenah joibípna caá. ²⁴⁻²⁵ Obohjeéhtih, yeéb Dios naáwátđih ñi naóh yapanachah joinít, Jesúsdiŋ jepah jwəhcanni nin pah ā niíj jenah joibípna caá: “Weém yéejni caá. Dios ninboó jəmnit, wā jenah joyátđih jéih beedáni jəmma, nitđihbut át jéihyanap taga”, ā niíj jenah joibípna caá. Páant niíj jenah joinít, bódicha caj yoh ñajnit, “Dios, meém niŋat jéihni, túini caá”, niijnít, Jesúsdiŋ ā jepahbipna caá.

Wáac jwinít, túinijeh jəmat

²⁶ Diosdiŋ weñat túut niijná, míc wáac jwinít, túinijeh chājat caá náahap. Yeéb niŋat ñi naáwáchah, ā túina caá. Obohjeéhtih, niŋat biícđih ñi niijcá bojoó. Túini Espíritu biquínadiŋ ewat ā wəhəchah, Diosdiŋ wēi ewat caá náahap. Biíđih bohéátđih ā wəhəchah, naáwát caá náahap. Biíđih Túini Espíritu ā jéihyanachah, caandíhbut naáwát caá náahap. Biíđih Túini Espíritu ā wēpatjĩh mácah wéheatjĩh ā naáwáchah, jwúub túut nuám naáwát caá náahap. Pániŋna, Túini Espíritu ded pah ā teo wáacachah, Jesúsdiŋ chah túi jenah joyát túut niijná, yeebđih naáwát caá náahap. ²⁷ Mácah wéheatjĩh naáwíhna, chénewā, biíc peihcannitjeh biquínajeh ĩ naáwá naáh. ĩ naáwátđih jwúub túut nuəmníbut ā naáwá naáh, yeéb niŋat ñi beh joyát pínah niijná. ²⁸ Obohjeéhtih, mácah wéheatđih jwúub túut nuəmní pínah wihcah, wáac jwinítđih ā naóhca bojo naáh. Caanjéh caolih díítboó Diosdiŋ ā úubú naáh.

29 Túini Espíritu ã teo wáacachah, Dios naáwát dih biquína ï naóh yapana naáh. Queét ï naóh yapanachah, joinítboodíh túi jenah joyát caá náahap, “¿Túini Espíritu ã naáwát túutni niít?” niíj jéihyat túut niijná. 30 Páant ã naáwáchahjeh, biíhdih Túini Espíritu ã naáwát túutuchah, jwíih naóhni boodíh yayát caá náahap, biíh jwuh ã naáwát pínah niijná. 31 Nihat biíc dih naóh yapacan, biquínajeh nihat naóh yapaat caá náahap, nihat míic wáac joinítboó ï bohéat pínah, ï weñat pínah, chah ï túi jumat pínah niijná. 32 Túini Espírituboó ã naáwát túutuchah joiná, naóhni pínahboó “¿Débólíh caá wã naóhbi, queétdih wã túi teo wáacat túut niijná?” niíj jenah joyát caá náahap. 33 Páant niíj jenah joiná, Dios ã náah yacat pah túinijeh ñi naóh yapabipna caá.

Diosboó nihat Jesúíhwã míic wáacnit dih túinijeh ã chãjat túutat pah, yeebdíhbut biíc yoobó ã náah yacna caá. 34 Pánihna, míic wáacna, Dios ã wutatji pah ï weha mánadih jepahna, ñi weha mána yaádh laihsanjeh ï joí chúudu naáh. 35 Úúbh joííhna, ïih munná jwúub juibínitjeh, ï weha mánadih ï úúbh joyó naáh. Yaádhboó pánih wéhena, bita wáac joinít ï túi joí ñunnátdih ï yéjanachah, ã túican caá. 36 Yeéb míic wáacnit, ded pah ñi túi jumat pínahdih páant wã naáwát dih joííhcan, nindih ñi túi jenah joyó: Jesúíh túini dooná dih yeébboó naóh waóh nit nihcan caá. Yeebjéh caandíh jepahnit nihcan caá. Pánih waóh nit nihcan, nihat biíh tútchinadih moón Jesúíhwã yeebdíh ï waáwáchah, ded pah ïpí chãjat dih náhninit, yeebbát biíc yoobó ñi chãjaá.

37 Ded “Weém Túini Espíritu ã wēpatjīh Dios naáwát dih naóh yapani caá. ã wēpatjīh weemdíh

ãpĩ jéihyana caá”, niij jenah joiníboó “Dios ã wʉtatdih ded pah jwĩ míc wáacatdih Pablo yoobópdiã ã naóh yapanap be”, ã niijí naáh. ³⁸ Obohjeéhtih, wã naáwátidih ã joyáh bojochah, bita caandíhbut ã joyáh bojo naáh.

³⁹ Pánihna, wã údwã panihnitá, Dios naáwátidih naóh yapaat túut niijná, Túini Espíritu ã teo wáacat pínahdih búdí ñi úbú. “Mácah wéheatjĩh ñi naóhca bojó”, niijcát caá náahap. ⁴⁰ Ñi jenah joyát pah-jeh chãjcan, Dios ã wʉtat pah túinijeh chãjat caá náahap.

15

Jesús ã boo pʉd jũúwát

¹ Bʉwã wã údwã panihnitá, Jesúih dooná yeebdíh ded pah wã naáwátjidih wã jwúub náhniabipna caá. Caán doonádih jwíih jepahnit, bʉubut jenah joinít ñi jamna caá. ² Caán doonádih ñi jepahachah, yeéb iiguípna bejnit déejidih Dios át túi ubʉp taga. Caán naáwátidih joí cádahcan, ãjeéh jamat túut niijná, Dios pebhboó ñi bejbipna caá. Obohjeéhtih, caandíh cádahna, ñi jwíih jepahatji dedé pínah nihcan niit.

³ Weemdíh jéihyani doonádih yeebdíh wã jwúub naáwáp jĩ. Oboh jamni naáwátjeh nihcan caá. Dios ã niijátji pah biíc yoobó Jesucristo jwĩ yéejat jíib át wʉn wãhʉp wʉt jĩ.* ⁴ Páant ã wanat túttimah, áih bácahdih ã yohochah, biíc peihcanni yeó jáap túttimah, Dios ã niijátji pah, át jwúub boo pʉd jũúwáp wʉt jĩ.* ⁵ Pánih boo pʉd jũóhni, Pedrodiã át jígohop wʉt jĩ.* Túttimah, ã bohénitjidihbut át

* 15:3 Is 53.5-12

* 15:4 Sal 16.8-10; Mt 12.40; Hch 2.24-32

* 15:5 Lc 24.34

jígohop wut jĩ.* ⁶ Túttimah, áihwā quinientos chah ĩ míc wáac juyúchah, queédihbut át jwúub jígohop wut jĩ. Biquína queét ennitjiboó ĩ wunuchah yuhna, nihat bitaboó páantjeh ĩ báadh jwuhna caá. ⁷ Túttimah, ā úud Santiagodih át jígohop wut jĩ. Pánih jígohnit, nihat ā naáwát túutnitdihbut át jígohop wut jĩ.

⁸ Pánih jígohniji jeáboó ā púuh laab béjat túttimah, yeejép wā chāj jwuhuchah, wā jepahat pínah jǎtih, weemdíhbut ā jígohop jĩ. Páant ā jígohochahjeh, ā boo pud júúwát dih túi jenah joinít, caandíh wā jepahap jĩ.* ⁹ Jesúíhwādih tubit yeejép wā chājachah yuhna, Jesús weemdíh jígohnit, áih doonádih ā naóh jibat túutup jĩ.* ¹⁰ Páant wā jumuchah yuhna, Dios weemdíh oinit, át jǐgah enep taga. Pánih jǐgah en túut nuumnít, Jesúih túini doonádih ā bohé jibat túutup jĩ. Pánihna, weemdíh ā teo wáacatjidih búdí wēinit, bita ā naáwát túutnit chah wā teona caá. Obohjeéhtih, wā wēpatjǐhjih nihcan, Túini Espiritu ā teo wáacachah, Diosdih wā túi teo wuhna caá. ¹¹ Weém, queét bita ā naáwát túutnitbut, jwiít nihat páant Jesúih doonádih jwĩ bohénachah, yeébbóo ñi jepahap jĩ.

Wunnit ĩ jwúub boo pud júúwát

¹² Jesúih doonádih bohéna, ā jwúub boo pud júúwát dihbut jwĩpĩ bohéna caá. Obohjeéhtih, páant jwĩ bohénachah joinít, nihat yeéb Jesúsdih jepahnit yuhna, ¿Dépanihna “Jwĩ boo pud júóhcan níit”, biquína ñi níj jenah joí? ¹³ Obohjeéhtih, boo pud júúwát ā wihcah nihna, Jesúsboó āta boo pud

* **15:5** Mt 28.16-17; Mr 16.14; Lc 24.36; Jn 20.19 * **15:8** Hch 9.3-6

* **15:9** Hch 8.3

jūóhcan tagaá. ¹⁴ Jesús ã boo p̄d jūóhcah nihna, ãih doonádih jwī bohéat, caandíh ñi jepahatbut dedé pínah ãta nihcan tagaá. ¹⁵ Páant ã boo p̄d jūóhcah nihna, Dioíh doonádih yee naóhnitjeh jwīta jum taga. “Dios Jesucristodih ãt booanap taga”, jwīpī níj bohéna caá. Obohjeéhtih, boo p̄d jūúwát ã wihcah nihna, Jesúsdih Dios ãta booacan tagaá. Caandíh ã booacah nihna, yee naóhnit jwīta jum tagaá. ¹⁶ Boo p̄d jūúwát ã wihcah nihna, Jesús ãta boo p̄d jūóhcan tagaá. ¹⁷ ã boo p̄d jūóhcah nihna, caandíh ñi jepahachah yuhna, dedé pínah ãta nihcan tagaá. Yéejat jíib páantjeh yeebdíh ãta jum tagaá. ¹⁸ Páant ã boo p̄d jūóhcah nihna, Jesúíhwã wunnit, iiguípna míicjeh ãta bej tagaá. ¹⁹ Pánihna, nin baácboó jum jwəhñit, Jesúsdih jwī jepahachah, ã teo wáacachah yuhna, jwī wənat túttimah páantjeh bəudná, jwíitboó chah moh yéejnit jwīta jum taga.

²⁰ Obohjeéhtih, Jesucristo yoobópdih ãt boo p̄d jūúwáp tajī. Caán caá jwíih boo p̄d jūóhni. Caán boo p̄d jūóh waóhni ã juməchah, jwíit ãihwābut jwī boo p̄d jūóhbipna caá. ²¹ Adán yéej chāj waóhna, ãt wən waáwáp tajī. Obohjeéhtih, Jesucristoboó yéej chājcanni jumna, wunniji ãt boo p̄d jūóh waáwáp tajī. ²² Adán yéej chāj waóhni, ã wənəchah, jwíit nihatbut yéej chājnit, jwīpī wənna caá. Obohjeéhtih, Jesúsboó ã boo p̄d jūóh waáwáchah, jwíit ãihwābut jwī boo p̄d jūóhbipna caá.* ²³ Nin pah ã jumna caá: Jesucristo ãt jwíih boo p̄d jūúwáp tajī. Túttimah, caán ã jwúəb dei jūúwúchah, jwíit ãihwābut jwī boo p̄d jūóhbipna

* 15:22 Ro 5.12-18

caá. ²⁴ Túttimah, nihat baácdih moón maáta ï wēpatdih, nihat nemépwã ï wēpatdihbut yap yoh beedánit, nin pah Jesús Diosdih ã niíj naóhbipna caá: “Dáa buca, Paá, weemdih ma chājat tútatdih buu wã péana caá. Buu meemjéh caá wutni”, ã niijbipna caá. ²⁵ Páant ã niiját pínah jãtih, Jesús páantjeh maáh ã jum jwuhah caá náahap, nihat Diosdih en jãihnitdih ã míic mao yap yohat pínah niijná.* ²⁶ Páant ã yap yohochah, jwĩ jwúub wuncan niít. ²⁷ Dios naáwátidih naóh yapani David nin pah át niíj daacáp tajĩ: “Dios nin pah ã niijná caá: ‘Wã wãúh Jesucristo nihatdih yap yohnit, maáh ã jumachah, nihat caandih ï jepahbipna caá. Obohjeéhtih, weémboó chah maáh jumna, wã wãúhdih wã jepahcan niít’, Dios ã niijná caá”, David át niíj daacáp tajĩ.*

²⁸ Jesucristo nihatdih yap yoh péanit, ã lípdih “Dáa, buu nihat meemdih ï jepahna caá. Weembút meemdih jepahni caá”, Diosdih ã niijbipna caá. Pánihna, Dios chah maáh ã jummbipna caá.

²⁹ Biquína yeéb Jesúsdi h jepah jwuhcan, ñi oinit Jesúihwã ï jummat peéh, ï mawachah ennit, nin pah ñi niíj jenah joyóp be: “Jesúihwã jumna, boo pud jãóhnit, Dios pebhboó ï bejbipna caá”, niíj jenah joinít, queétdih jwúub enihna, túut nuumnít, ñit daabáat túutap wat be. Obohjeéhtih, boo pud jãúwát ã wihcah, páant ñita chājcan tagaá. ³⁰ Jesúih doonádih jwĩ naáwát peéh, jwiítidihbut ï mawat dée tobohna caá. Pánihna, “Wã boo pud jãóhcan niít”, niíj jenah joiná nihna, wãta naóh cádah tagaá. ³¹ Wã jéihna caá, yeó jáap jummat pah weemdih

* 15:25 Sal 110.1 * 15:27 Sal 8.6

ĩ mao yohat dée tobohna caá. Obohjeéhtih, wã naáwáchah joinít, yeéb ñi túut nũmát dih ennit, búdí wã wěina caá. Pánih wěinit, ã tobohochah yuhna, wã naóh cádahcan niít. ³² Nin Éfeso tútchidih dawá jiowã pah íijnit, Jesúih doonádih wã naáwát jíib, weemdíh ĩ mawíhip yuh jí. Pánihna, boo pud jũúwát ã wihcah, dedé pínah áta nihcan tagaá. Jwĩ boo pud jũóhcan, “Waícanjeh jwĩ wunat pínah jãtih, jwiít dih wěi babh jeémátjeh caá náahap”,* ĩpĩ niiját pah yoobóp dih áta jum taga. Obohjeéhtih jwĩ boo pud jũóh bipna caá.

³³ Yee naóh nit dih ñi joyáh bojoó. “Yeejépwádih pej jum nit, biíc yoobó yeejé ñi jum bipna caá”, bita ĩ niiját dih ñi túi náhninaá. ³⁴ Yeebdíh jwúub túi jenah joinít, yéej chãj cádahat caá náahap. Biquína ñijeéh jum nit Dios dih túi jéihcan, jwiít dih ã boo pud jũúwát tútat pínah dih but jenah joicán, ĩ yéej chãjna caá. Páant ĩ chãjat dih yeebdíh tíicat caá náahap.

Ded pah túttimah jwĩh bácah ã jum at

³⁵ Biquína yeéb “Jwĩ jwúub boo pud jũóh bipna caá”, jwĩ niiját dih páantjeh beh joicán, nin pah ñi niij úbh joimí nacaá. ¿Ded pah wunnit ĩ jwúub boo pud jũóh bi? ¿Ded pah ĩh bácah ã jum bi? ñi niij úbh joimí nacaá. ³⁶ Pánih úbh joiná, ñi túi jenah joicán caá. Momnidih ñi jenah joyoó. Jwĩ momochah, áih jih bóo chóa ã wunuchahjeh, diítmant bóo ãpĩ chíih jũóhna caá. Á wuncah, áta chíih jũóhcan taga. ³⁷ Chíih jũóh niboó jwĩ momnidih biíc yoobó nihcan caá. Pánihat dée jwĩ jwúub boo pud jũúwáchah, jwĩh bácah but mácah ã jum bipna caá. ³⁸ Nihat jwĩ momni chíih jũóh nit ded pah ã

* 15:32 Is 22.13

jumat pínahdih Diosboó ãt chãjap taga. Biúhnajĩh jwĩ wid momochah, biíc pah jíghoni míic ã chíih jũóhcan niít.

³⁹ Páant ã jumat dée nihat bácahnabut biíc yoobó nihcan caá. Cãacwã, nuñúpwã, jwébehwã, queejwã nihat ïih bácah mácah ã jumna caá. ⁴⁰ Nihat jeáboó jumni, baácboó jumnibut biíc yoobó nihcan caá. Jeáboó jumni ã túyat mácah, baácboó jumni ã túyatbut mácah ã jumna caá. ⁴¹ Nihat jeáboó jumnibut biíc yoobó ã yeh iigcán caá. Yeóboó mácah, widhboó mácah, cúiwãbut mácah ã yeh iigná caá. Cúiwã míicjehbut mácah ã yeh iigná caá.

⁴² Pánihna, momni mácah ã chíih jũúwát pah, jwĩ wunuchah, ï yohni bácah jwúub boo pud jũóhna, mácah ã jumbipna caá. Jwĩ wunuchah, jwĩih bácah ã moópbipna caá. Obohjeéhtih, jwĩ boo pud jũúwát túttimah, jwĩih jáap bácah ã jwúub moópcan niít. ⁴³ Jwĩ wunuchah, jwĩih bácah ã túi jíghocan caá. Obohjeéhtih, jwĩ boo pud jũúwúchah, túini ã jumbipna caá. Jwĩ wunuchah, jwĩih bácah wēpcanni caá. Obohjeéhtih, jwĩ boo pud jũúwúchah, túi wēpni ã jumbipna caá. ⁴⁴ Nin baácboó jwĩ jam jwahni bácah ã wunbipna caá. Obohjeéhtih, Dios pebhboó jumni pínah bácah ã jwúub boo pud jũóhbipna caá. Nin baácboó jwĩ jumat pínah bácahdih Dios ãt wūhup wut jĩ. Pánih wūhna, biíh bácah ãjeéh jumat pínahdihbut ã wūhbipna caá.

⁴⁵ Dios naáwát dih daácni nin pah ãt niij daacáp tajĩ: “Ã jwĩih chãjni newédih Dios ãih bácahdih caolih jéyanachah, ãt caolih wáyap wut jĩ. Caán

newé Adán át wūt jumap wut jī”, át niij daacáp tajī.* Obohjeéhtih Jesucristo, Péeni Adán wūt jumnidih booanit, áih bácahdih Dios mácah át chājap wut jī. Pánih caandíh booanit, jwiít dihbut ā boobipna caá, ā pebhboó ājeéh jwī jummat pínah niijná. ⁴⁶ Nin baácboó jwī jummat pínah bácahdih Dios át jwíih chājap tajī. Túttimah, jeáboó ājeéh jwī jummat pínah jáap bácahdihbut ā chāj wūhbipna caá. ⁴⁷ Dios Adándih baácjīh át chājap wut jī. Obohjeéhtih, Jesucristoboodíh jeámant át wah deyanap wut jī. ⁴⁸ Jwiít nihat Adán jumena jumna, áih bácah déedih jwī bíbohna caá. Jesucristoíhwā jumna, áih jáap bácah déedih jwiítbut jwī bíbohbiipna caá. ⁴⁹ Būū nin baácboó jum jwuhna, baácjīh chājni Adán pah jíghnit jwī jumna caá. Túttimah, jeáboó jumna, Jesús pah jíghnit jwī jumbipna caá. ⁵⁰ Wā údwā panihnitá, páant wā naáwát dih jenah joinít, nindih ñi táí náhninaá: Nin baácboó jwī jum jwuhni bácah, yéejni jumna, Dios pebhboó yéejat wihcapna ā jéih jumcan niít. Moópni pínah jumna, Dios pebhboó moopát wihcapnabut ā jéih jumcan niít.

⁵¹ Játih Dios ā jéihya jwuhca naáhdih būū yeebdíh wā naóhna caá. Nin wā naáwát dih ñi táí jenah joyoó: Jesucristo ā jwúub dei jūúwát pínah játih, nihat jwiít áihwā jwī wancan niít. Obohjeéhtih, jwī wunat túttimah, jwī wun jwuhcah, bíic yoobó jwiít nihatdih ā túut nūumbípna caá. ⁵² Bíic láa quíib pínah bojat pah jwī túut nūumát ā jumbipna caá. Péeni póojat nah ā yáanachah, jwiít nihat áihwādh Dios ā túut nūumbípna caá. Ā yáanachahjeh, nihat áihwā wannitji jáap bácah jumnit ī jwúub

* 15:45 Gn 2.7

boo pud jũóhbipna caá. Æihwã báadhnitdihbut ã túut nuumbípna caá.* 53 Bũũ jamni bácah wũnna, ã moópbipna caá. Obohjeéhtih, jwiít dih ã túut nuumát túttimah, jwĩih jáap bácah jwúub wũncan, ã moópcan niít. 54 Páant ã yapachah, Dios naáwát dih naóh yapani Isaiás nin pah ã niij daacátji biíc yoobó ã yapbipna caá: “Dios nihatdih át yap yohop tagaá. Páant ã yap yohochah, Æihwã ã jwúub wũncan niít”, át niij daacáp tajĩ.* 55 Dios naáwát dih naóh yapani Oseas nin pah ã niij daacátjidihtibut biíc yoobó ã yapbipna caá: “¡Wũnat ã jwúub wi-hcan niít! Pánihna, bũũ jwĩ yéejat peéh wũnatdih jwĩ úumcan caá”,* ã niij daacátji pah jwiít Æihwã wẽinit, jwĩ niijbípna caá. 56 Moisésji ã wũtatdih jéihna yũhna, jwiít nihat jwĩpĩ tái jepahcan caá. Pánih jepahcan, “Weém yéejni caá”, jwĩ niij jéihna caá. Páant jwĩ jummatdih jéihnit, jwĩ wũnat túttimah, dedé yéejat peéh chãjatdih úumna, wũnatdihbut jwĩpĩ úumna caá. 57 Obohjeéhtih, Jesucristo wũn wũhnit, ã jwúub boo pud jũúwáchah, jwiít Æihwã iiguípna bejnit déeji jwúub boo pud jũóhnit, Dios-jeéh jummat túut niijná, ã pebhboó jwĩ bejbipna caá. Páant jwĩ jummat pínahdih jéihna, Diosdih búdí wẽinit, “Táina caá”, jwĩpĩ niijná caá.

58 Wã úudwã panihnitá, yeebdih búdí oinit, nin pah wã naóhna caá: Jesús dih ñi jepah cádahca bo-joó. Bitaboó yeebdih yeenit, mácah ã bohénachah yũhna, joyáh bojnit, yoobóp dih Jesús dih doonádih ñi tái jenah joyoó. Pánih jenah joinít, “Diosdih jwĩ teo wũhat bũudní pínah nihcan caá”, niij jéihnit, ded

* 15:52 1Ts 4.15-17 * 15:54 Is 25.8 * 15:55 Os 13.14

pah ã chãjat tútatdih túi wēinit, ñi chãjaá.

16

Ded pah dinerodih wãhat

¹ Bũũ biíh naáwátidih yeebdíh wã naóhbpna caá. Jerusalén tútchidih moón Jesúíhwãdih teo wáacat pínah dinerodih ded pah ñi chãjat pínahdih wã naóhbpna caá. Galacia baácđih moón Jesúíhwã míc wáacnitdih nin pah wã chãjat tútat pah biíc yoobó ñi chãjaá.* ² Chooát yeó jáap jummat pah débóo dinero ñi wãhat pínahdih yeéb nihát ñi jwejepboó ñi ámohoó. Det í tewat jíb búdí bíbohnit, búdí í ámoho naáh. Det bainí bíbohnit, bainí í ámoho naáh. Pánih ámohna, ñi pebhna wã jwibínachah, queét moh yéejnitdih ñi wahni pínah dinerodih ñi bíbohbpna caá. ³ Wã jwibíát pínah jãtih, dinerodih ãb bejnit pínah neonádihbat ñi ñíwií. Páant ñi ñíwichah, jwibínit, Jerusaléndih moón Jesúíhwã queétdih í túi jéihyat pínah niijná, wã daác wãhbpna caá. ⁴ Weemdíhbat Dios ã wahachah, queét biícđih wã bejbipna caá. Obohjeéhtih, wã jéih jwuhcan caá.

Pablo ã jib bejat pínah

⁵ Nin pah wã jib bejat pínahdih wã niij jenah joiná caá: “Ninmant bejnit, Macedonia baácđih jumni tútchinadih jib bej péanit, Corinto tútchidih moón Jesúíhwã pebhna wã jwibíbpna caá”, wã niij jenah joiná caá.* ⁶ “Maatápdih íjeéh chão jwúhñit, mah noój ã yapat túttimah, biíh tútchina wã bejbipna caá. Pánih chãoníji wã yap bejat tútat

* **16:1** Ro 15.25-26; 2Co 8-9 * **16:5** Hch 19.21

chãjachah, weemdih ï jéih teo wáacbiḡna caá”, wã niij jenah joiná caá. ⁷ Pánihna, ñijeéh maatápdih jumíhna, Macedonia baácđih wã jib bejat túttimah ñi pebhboó wã juibíbiḡna caá. Butéh bejna, maátcanjeh wãta jéih jum tagaá. Dios ã náahachah, túi maatápdih ñijeéh wã chão jwũhbiḡna caá. ⁸ Obohjeéhtih, butéh nin Éfeso tútchiboó Pentecostés yeó jáapnadih páantjeh wã jum jwũhbiḡna caá.* ⁹ Ninboó dawá wã bohéatđih íjnit, ï bohéat túutcah yũhna, Dios ã teo wáacatjĩh búdí wã bohénachah, dawá joiná caá ï chãap. Pánihna, weemdih ïjeéh jummat caá náahap. Pánih jumniij Pentecostés túttimah, ñi pebhna wã bejbiḡna caá.*

¹⁰ Timoteo ñi pebhna ã juibínachah, ã náhni dahwacat pínah niijná, ñi túi teo wáacá. Jwĩ Maáhdih teo wũhni wã jummat pah, caanbát Jesúsđih teo wũhni caá. Páant ã jumũchah, caandih ñi túi en dawaá.* ¹¹ Caandih yap yohcanjeh, yeéb nihatđih túi joyát caá náahap. Caandih túi wẽinit, wã jumapna ã jwũub jũúwát pínah niijná, ñi túi teo wáacá. Caán, biĩh Jesúsíhwã biícđih ï jwũub juyát pínahđih wã bidna caá.

¹² Apolosđih “Bita Jesúsíhwã biícđih Corinto tútchidih moón Jesúsíhwãđih meembát enedih ma bejeé”, wã wẽp niijíp yũh be. Obohjeéhtih, bũũ ã jéih bej jwũhcan caá. Túttimah, débólih ã bejĩhna, ã bejmi dée caá.

Pablo ã pée túyat túutat

¹³ Bitá ï yéjeaat déedih yap yohat túut niijná, túi jenah joinít jummat caá náahap. Nemépwãbut ï

* **16:8** Lv 23.15-21; Dt 16.9-11
1Co 4.17

* **16:9** Hch 19.8-10

* **16:10**

yéjaat déedih úumcanjeh, yap yohat túut niijná, Jesúsdiñ ñi túi jenah joí cádahca bojoó. ¹⁴ Pánihna, oinit, bitadih túi chājat caá náahap.

¹⁵ Wā úudwā panihnitá, nihat Acaya baácdih moón Jesúsdiñ ñi jepahat pínah jātih, Estéfanaswā ñi jepahatjidih ñi jéihna caá. Queét Jesúihwādiñ búdí ñi teo wáacna caá.* ¹⁶ Pánih teo wáacnit jumna, ñi naáwáchah, ñi túi jepahaá. Bitá queét panihnit maáta, bitá Jesúsdiñ teo wāhnitdiñbut túi jepahat caá náahap.

¹⁷ Yeéb Corintodih moondih búdí bidna wā chājav be. Pánihna, ñi wahnit Estéfanas, Fortunato, Acaicojñh ninna ñi juyúchah, búdí wā weñep be. ¹⁸ Yeéb biíc diñ jumna, yeebdih ñi weñanap tagaá. Biíc yoobó ninna jainít, weemdihbut ñi weñanap be. Pánih teo wáacnit diñ “Ñi túi chājav be”, yeebdih niiját caá náahap.

¹⁹ Asia baácdih moón Jesúihwā míc wáacnit yeebdih ñi táyat túutna caá. Aquila, Priscilajñh ñiñ muúboó míc wáacnit Jesúihwābut búdí ñi táyat túutna caá. “Jwñ Maáh Jesúsjeéh ñi túi jumna naáh”, niijnít, ñi táyat túutna caá.* ²⁰ Nihat nin Éfeso tútchidih moón Jesúihwābut yeebdih ñi táyat túutna caá. Yeebát Jesús ñi oyatjñh ñi túi míc muúbá.

²¹ Bññ nin péenibit diñ weemjéh wā daácna caá. Weembát yeebdih búdí wā táyat túutna caá.

²² Ded jwñ Maáhdih túi oicannidih Dios ñi peéh chāja naáh. Jwñ Maáh Jesús waicanjeh ñi jwñwñ dei jéuwú naáh.

* **16:15** 1Co 1.16 * **16:19** Hch 18.2

²³ Jwĩ Maáh Jesús yeebdíh búdí oinit, ã teo wáaca naáh. ²⁴ Jesucristo ã oyatjĩh biícdih moon páh yeéb nihatdih búdí wã oina caá.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
34c9543b-57a6-5290-ab7b-4fa15529a7e2